

Mak

Jon kaltu na gugu tarawen e fagati e sal ke Taufi

¹ I gii e tofnge lo konona sunwar lo Yesus Kristus, Sikow e Deo.

² Profet Aisaiya e sam seti e sunwar Deo e peteng tifi ini aregii,

“Yau mu tuleni e ti anunune kiang famu iyo,
ku la fagatiufu e sal kiam.

³ Ulo male e tek ti kaltu, angkiimkiim a neng e tautau aregii,

‘Fagati e sal ke Taufi, fariisu e fan sal kia.’ ”

⁴ Ma Jon i e kaltu una musngeni e amfagu tarawen, i e fespuek ulo male e tek ti kaltu ma i ka sesngeni lala e sunwar tifre tongge ini riu sangikis ma kepe e amfagu tarawen una fanangsi ini ri sam iksi e balbalri, usi Deo eu sangintafngi e fan tubiil keri.

⁵ Ma tongge fuunfuun tinglo distrik Judia, ri tiim tura tongge tingna Jerusalem ri la use Jon ma ri ka fabeku e fan tubiil keri ma Jon ka gu tarawen iri lo Dan Jodan.

⁶ Jon bingne e los lo kolos ri bilseni lo ololow e kamel, ma e diidiit ine aneueu kia, ri bilseni lo pinumfow e man. Ma i e enene fang ko ma fan ani tingna mok.

⁷ I e sesngeni e sunwar aregii, “Nenge kaltu e mu puek wimi i yau, ma rawas kia e kulfi e rawas kiang. Ya tibi ta konona kaltu e fasi ini yau kis

ine ampukangkekeng ma ya ku pikii e amfinau lo su kia.

⁸ Ya gu tarawen i gam ine dan safle i eu gu tarawen i gam ine Tangwa Riis.”

Amfagu tarawen ke Yesus

⁹ Lo biing a, Yesus e la kosnge Nasaret ilo distrik Galili ma Jon ka gu tarawen ini ulo Dan Jodan.

¹⁰ Ma biing Yesus e biik tinglo dan, i e pari e balambat e rages ma Tangwa Riis ka pu talo are anman e par are ambal.

¹¹ Ma neng e angkiimkiim ka tau tinglo balambat aregii, “O na Sikuang ya buro tikin. Balang e gasgas lo o.”

Satan e lamu e Yesus

¹² Ma saupesak Tangwa Riis e tuleni e Yesus ka la ulo male e tek ti kaltu.

¹³ Ma Yesus e melmel ulo male e tek ti kaltu ulo lo e fet e sangful na biing. Ma Satan ka lamu. I e melmel tura fan man rokai ma fan angelo ri ka ulsi.

Yesus e tau ire fan disaipel baba tikii

¹⁴ Biing ri sam tafu e Jon ulo rerek Yesus e sa fespuek ulo distrik Galili ma i ka sesngeni e konona sunwar lo Deo.

¹⁵ I e war aregii, “Biing e sau puek ma Kepmale ke Deo e sau fatat sekit. Gam samusu iksi e balbalmi ma titinge lo konona sunwar.”

¹⁶ Yesus e fes ulo pisow e salat Galili, ma i ka pari e Saimon tura tualik Enru iru basbas ine ubiin ulo balan salat, le ru ta ung kaltu na tuntunii.

¹⁷ Ma Yesus ka war singru, “Kamun mi nami yau, ma ya ku fatiti kamu una tuuktuuk ire tongge.”

¹⁸ Ma saupesak ru ka tafu e fan ubiin keru ma ru ka mi nami.

¹⁹ Biing Yesus e sau fes ka la u tapak balik, i e pari e Jeims sikow e Sebedi tura tualik Jon ulo bala mon, ru terterngeni e fan ubiin.

²⁰ Ma saupesak i ka tau iru, ma ru ka la kosnge tamru Sebedi ka ngosok ulo mon tura tongge namus keru, ma ru ka la nami e Yesus.

Yesus e feselufu e tangwaner saksak

²¹ Yesus tura fanenger fan tongge ri la una Kapenaum, ma lo Biing Sabat e fespuek i e kaulek ulo felun nining ma ka fabenge singre tongge.

²² Ri ka ongni e sunwar kia. Ma tongge fuun-fuun uwa ri tiin la kuufsak lo fan fabenge kia. Anwarow, i e fabenge singri are kalu e mel e rawas kia, ma mia e mel. E tibi ngo are fang titsa tinglo fafanau.

²³ Lo biing a, neng e kalu ulo bala felun nining keru e mel e tangwaner saksak ulo, i e kaung bakir tikin aregii,

²⁴ “Yesus, tingna Nasaret! O bala sa tamu i kemem? Kele ma o fespuek una sa bero i kemem? Ya parfat lo o. O na Kalu Pepe ke Deo.”

²⁵ Safle Yesus e porow e tangwaner saksak a, aregii, “On fakuta e ngusum ma ok la kosnge kalu a.”

²⁶ Ma tangwaner saksak ka gaseni e kalu a ma i ka kaung bakir ma tangwaner saksak ka la kosngi.

²⁷ Ma tongge nano ri kuufsak ma ri ka fawar falifu iri tibom aregii, “Sa ka fespuek gii? Kaltu gii e fabenge ine sunwar fuu ma i ka sesngeni e sunwar are kaltu e mel e mia lo matam fabenge aregii. Ma bingne i e tow e fatungen tifre fan tangwaner saksak ri ongne singi.”

²⁸ Ma sinseng lo fan mok Yesus e gow e omsene kiruur e distrik na Galili.

Yesus e faliungere tongge fuunfuun

²⁹ Yesus tura fan disaipel kia, ri la kosnge felun nining ma ri ka suu una male, ma ri ka la ris ulo fel ke Saimon ma Enru. Ma Jeims ma Jon iru la ming.

³⁰ Yanow fefin e Saimon e ngongo ulo ngiin, e bokor. Ma ri ka peteng tife Yesus ini e mase.

³¹ Ma Yesus ka la usi, ka puse lo limow, ka famtete ma ambokor a ka rop tinglo, ma i ka tofng e una fagati e fan tuan ari.

³² Lo biing pisie e la suu lo efef, ri ka uun puek ire tongge nano ri mase tife Yesus ma ri ka uunpuek ming ine tongge nano e mel e fan tara saksak ulo ri.

³³ Tongge nano tinglo taon a, ri sa tiin melmel fatatu e matangkon lo fel.

³⁴ Ma Yesus ka faliungere fa fuunfuun sak lo re tongge ri mel lo fan matan minse ma i ka tii ine e fuun lo fan tara saksak. Tafen i ka fanau re fan tara saksak ini riu tibi gon, anwarow ri parfat ini i gii se.

Yesus e la nining ulo malebiil

³⁵ Lo biingbiing e mok sak, e or uwa e male, Yesus e kuuf ka suu una male ma i ka la ulo galu e tek tikas ulo, ma i ka la nining uwa.

³⁶ Ma wimi Saimon tiim tura fan taltalu ri ka sik ine Yesus.

³⁷ Ma biing ri la tonggeni, ma ri ka peteng tifi aregii, “Tongge nano ri ngos na sik iyo.”

³⁸ Ma i ka peteng tifri aregii, “Kiar u la ilo fanenger fan susun male gii fatat, usi yau la sesngeni e sunwar tifri ming, i e mus mung gii ya ka puek una musngeni.”

³⁹ Ma i ka fes fawet ulo distrik Galili, ma ka sesngeni e warwar ulo fan felun nining keru, ma i ka tii ire fan tara saksak.

Yesus faliungeni e kaltu lepra

⁴⁰ Nenge kaltu e mel e anminse lepra ulo e puek use Yesus ma i ka pukungkek, ma ka peteng tife Yesus aregii, “Le o ka bura, o fasi una faliunge yau.”

⁴¹ Yesus e tengsi tikin ma i ka sangau ine limow ka pot lo, ma ka war, “Ya fabur! O samusu kalkaliis.”

⁴² Saupesak anminse lepra e la kosngi ma i ka liu.

⁴³ Ma saupe Yesus ka uun ufu ka la, ma ka war rawas singi,

⁴⁴ “Ate kausi! Ou tibi peteng tife tikas ine mok e sau fuut lo o. Safle ou la, o ku la fanangsi o tibom tife pris ma o ku gow e finafen aregii Moses kabuk peteng, una fanangsi re tongge ini o sam kalkaliis.”

⁴⁵ Safle kaltu gii e la, ka la seseng fawet tifle tongge nano. Sinseng gii e omsene male, iya

Yesus kam tibi fasi una fes malal na matre tongge ulo fan taon. Yesus e la subung ulo fan male e tek tong kaltu, safle tongge ri kasu puek talo tinglo fan mara male.

2

Yesus e faliunge e kaltu dol

¹ E tibi fuun e biing wimi ma Yesus ka kaulek mil una Kapenaum, tongge ri ong ini e sau puek ulo fel kia.

² Ri ka la tiim ulo fel a, i e fel a e fuunuf tikin, kala muut una male ine matangkon e am tek ti sol. Ma Yesus ka sesngeni e sunwar tifri.

³ Ma e fet e kaltu ri ka kepuek ine neng e kaltu e dol, ri ka sa tafu.

⁴ Fel e fuunuf tikin, ri tibi fasi una tau fu e kaltu a fatatu e Yesus. Ri ka kepe ri ka fen tura ulo poktow e fel a, ri ka paek salu ma ri kau fauli e ngiin ine kaltu a e ngongo ulo, ka pu bala fel.

⁵ Biing Yesus e pari ini titinge keru e raw tikin, kam war singe kaltu a aregii, "Sikuang, ya sam kepufu e fan tubiil kiam."

⁶ E mel e fan titsa lo fafanau ri kiiskis ming ulo bala fel, ma ulo sinsinangu ri, ri sangsang aregii.

⁷ "Areini gii, kaltu a ka war ine sunwar e ngo aiya? I e fotpursi e Deo! E tek ti kaltu e fasi una kepufu e fan tubiil. Faim ke Deo tibom."

⁸ Ma saupesak e sau parfat lo bala sinangu ri, i kam gatom aregii. "Usi e tamu ka mel e sangsang aiya ailo sinsinangumi?"

⁹ Sese sunwar e paumiil una war ini tife kaltu dol gii? E paumiil una war ini, 'Iya sam sang-intafngi e fan tubiil kiam,' tam, e paumiil una war

aregii, 'On matet, ong kepe kem ngiin ma o ku fes?'

¹⁰ Safle ya bura ini gam samusu parfat ini, Sikow e Kaltu e mel e mia gii lo nal una kepufu e fan tubiil." Yesus ka par use kaltu dol a, ma ka war aregii,

¹¹ "Ya peteng tifo, matet, kepe kem ngiin ma o ku la mil ilo keu fel."

¹² Ma kaltu a ka matet nabalan fan matri nano ka kepe ke ngiin ma ka fes ka la, tongge ri ka kuufsak tikin ri ka resngeni e Deo ma ri ka war aregii, "Kemem tifik par ti mok ek ngo aregii, e tam sekit."

Yesus e tau ine Liwai

¹³ Yesus ka fes ka la ming ulo pisangkin lo salat ina Galili. Ma singmat na galung kaltu ri ka puek usi. I ka fabenge singri.

¹⁴ I ka fes ka la ma ka pari e Liwai sikow e Alfius e kiiskiis ulo bala felun mani, Yesus ka war singi aregii, "On minami yau." Ma Liwai ka matet ka minami e Yesus.

¹⁵ Lo biing Yesus e enenen ulo bala fel ke Liwai, ma tongge na kepkep mani, ma tongge na tumtubiil ri kiis ri ka en tiim tura Yesus, ma fan disaipel kia. E mel e fuunfuun lo re matang kaltu a, ri mimi nami e Yesus bingne.

¹⁶ Ma tomfa lo re fan titsa lo fafanau ri ta fam Farasi, ri ka pari e Yesus e kiiskiis ka enenen tura tongge na tumtubiil, ma tongge na kepkep mani. Ri ka gatom re fan disaipel ke Yesus aregii, "Usi e tamu titsa kemi ka en tiim tura re tongge na kepkep mani, ma tongge na tumtubiil?"

¹⁷ Yesus ka ongni e sunwar keru, ka war singre tongge parfat a aregii, “Tongge ri tibi mase, ri tibi la use dokta, safle tongge ri mase ri la use Dokta. E su ngo aregii, ya tibi sa la una tau ire tongge riis, e tam. Ya sa la una tau ire tongge na tumtubiil.”

Gatgatom use sinang na fel ine tuan

¹⁸ Fan disaipel ke Jon ma fan Farasi, ri feleni e en, ma fa, fang kaltu ri ka sa gatmo e Yesus aregii, “Usi e tamu fan disaipel ke Jon ma fan disaipel kere fan Farasi ri ka feleni e en, ma fan disaipel kiam ri ka tibi feleni e en?”

¹⁹ Ma Yesus ka koso singri aregii, “Gam sang ini fam fenfenngow e kaltu a ka rong una tinaule ri ku feleni e en, ma i ka melmel iwa tura ri? Biing kaltu a ka melmel aiwa inais ri, ri tibi fasi una fel.

²⁰ Safle e mu mel e biing eu puek una onu e kaltu a ka rong una tinaule ku la kosing ri, lo i e biing a ri kamu fel a.

²¹ “E tek ti kaltu eng kepkepe ti sung kael fuu una sok kaleni e amfur ailo kolos ting nangen. Le i ku gow aiya, biing riu gua e kolos sung kael a una kaleni e amfur a, eu la tete ma ku sisi mil e kolos ting nangen. Le i ku gow aiya su fuu eu rangsi e su ting nangen ma amfur a ku la sisi bakir.

²² Ma e tek tikas en ututfi e ti waen fuu ilo bala ampinun me ting nangen. Le i ku gow aiya, waen a eu ese paki e ampinun me, ma i ru nano ru ku tiin sak. E tam, ri ututfi e waen fuu ilo ampinun me fuu.”

Taufi lo biing Sabat

²³ Nenge biing Sabat Yesus e fes lala ulo bala fam palang na wit, ma fan disaipel kia ri ka la nami, ri ka kutuul pakti lala e fanenger lo ri.

²⁴ Ma fam Farasi ri ka gatmo e Yesus aregii, “Use sa ri ka gow e mok e pepe una gow lo biing Sabat?”

²⁵ Yesus ka koso e sunwar kerii aregii, “Ya sang ini gam tifik wese e pansinseng lo mok Dewit e sam gow nangen? Yau war lo biing lewa, i tiim tura tongge kia, ri pospos lo tuan ma ri ka fitol.

²⁶ Abiatar e ta paklure fam pris lo biing a, ma Dewit ka kau ulo bala fel ke Deo ka la eni e beret a, e pepe, fam pris tibom ri bom eneni. Sakle Dewit e la eni, ma kau fenre tongge kia ming ini. Gam tifik wese pansingseng gii?”

²⁷ Ma Yesus ka war singri ming aregii, “Deo e tibi taufre tongge una ulsi e biing Sabat, e tam, i e taufu e biing Sabat una ules re tongge.

²⁸ Aregii Sikow e Kaltu e ta Taufi lo biing Sabat.”

3

¹ Yesus e la kaulek mil ulo bala felun nining, ma neng e kaltu galun limow e sau met i uwa ming.

² Ma tongge ri ka efe kausi sak lo Yesus. Usi e tamu ri bur parfat ini eu faliungeni e kaltu a lo biing na Sabat, tam e tam. Ri sang ini le Yesus ku gow e sinang a, ri u sesuupuek ini.

³ Yesus ka war singe kaltu a limow ka sak aregii, “Kasa o ku sa ti na matre tongge.”

⁴ Ma Yesus ka gatom ri aregii, “Sese fafanau kiar u usi lo biing Sabat? Una gow e konona sinang, Tam una gow e sinang e sak? Una faliungere tongge, Tam una paketmet iri?” Safle tongge ri tibi kos ti sunwar.

⁵ Yesus ka alal lo ri ma bala ka la tuntun e pari e balbalri e kut, bala ka sak lo mok a. Ka war singe kaltu a aregii, “Fariisu e limam.” I ka fariisu e limow, ma limow ka kausi mil.

⁶ Ma saupesak fam Farasi ri ka suu tinglo bala fel ri ka la, ri ka la tiim tura galung kaltu ke King Erot ri ka la gow e fan warwar una sik ine ti sal una paketmeteni e Yesus.

Tongge fuunfuun ri mi nami Yesus

⁷ Yesus tura fan disaipel kia ri la kosngi e male a, ri ka la ulo salat Galili ma tongge fuunfuun sak tingna Galili ri ka mi nami, ri ka la.

⁸ Tongge nano tingna Judia, tingna Jerusalem, tingna Idumiya, ma tinglo galu ilo anisow e Dan Jodan, ma tinglo galu ina Tair ma Sidon. Ri ong lo sinseng lo fan mok Yesus e gow, ri ka puek usi.

⁹ Yesus ka war singre fan disaipel kia aregii, “Singmat na galung kaltu gii are ri ka situf yau ma ri kam suleuf yau. Kepe ti mon wagii una nene. Le tongge gii ri ku fasit sak, Yau la kiis ilo mon.”

¹⁰ Famu Yesus e sau faliungere tongge fuunfuun, iya tongge ri mase, ri ka bur potlo, ri ka sulsule re fa fasap ri usi ri tibom ri u la fatatu.

¹¹ Ma biing fan tangwaner saksak ri ka pari, ri su luut ufaf na mata, ma ri ka tau aregii, “Ona Sikow e Deo.”

¹² Sakle Yesus e fanau sak iri ini riu tibi peteng suupuek ini i se tikin.

Yesus e tafu e tikii sangul ma e u na apostel

¹³ Yesus e la kanek ulo paklunmale, ka tau ire tongge e bur ri, ri ka puek usi.

¹⁴ Ka tafu e tikii sangful ma e u na kaltu, usi riu melmel tura, ma ka foteng ri ini fan apostel, usi ini eu tuleri una la sesngeni e sunwar ke Deo.

¹⁵ Ma ka tow e rawas tifri una feselufu e fan tangwaner saksak.

¹⁶ E tafu e sangful ma e u: Neng asow gii Saimon, Yesus ka fotngi ming ini Pita.

¹⁷ Ma ka tafu e Jeims, sikow e Sebedi, tura tualik Jon. Ma ka foteng ru ine as gii Bonages, (pimpiku gii, Un Sikow e ampararak).

¹⁸ Ma ka tafu ming e Enru, Filip, Batolomius, Mateus, Tomas, Jeims sikow e Alfius, Tadeus, ma Saimon kaltu tinglo galung kaltu ri foteng ri ini fan Silot,

¹⁹ ma Judas Iskariot i e kaltu una mu solamufu e Yesus.

Yesus ma Belsebul

²⁰ Yesus ka la ulo fel ma singmat na galung kaltu ri ka sa tiim lo ri ming, ma e tek ti boron sumbiing una en singe Yesus ma fan disaipel kia.

²¹ Ma fumberat lo Yesus ri ong lo fan mok Yesus e gow, ri ka puek una sa onu. Ri peteng aregii, “I e lomba.”

²² Fa lo re fan titsa lo fafanau, ri la una Jerusalem ri war aregii, “Belsebul e mel ailo. E fesfesel re fan tangwaner saksak lo rawas ke Belsebul mung, paklure fan tangwaner saksak.”

²³ Yesus ka tau iri, ri ka puek fatatu, ma ka gow e warwar toftof tifri ka war aregii, “Satan e fasi una fesi e Satan?”

²⁴ Le tongge tinglo tikii kaontri eu tapot lo ri, ku u e galung kaltu ma ri ku fapaket, kaontri a eu tibi fasi una ti raw.

²⁵ Le fumberat tinglo bala tikii fel eu tapot ku u lo ri ma ri ka fapaket, fumberat a ri u tibi fasi una ti raw.

²⁶ Ma le Satan ku sak lo i tibom ma galung kalту kia ri ku tapot, e tibi fasi una ti raw, e tam, eu rop sekit.

²⁷ E tek ti kalту e fasi una kau bala ti fel ke ti kalту rawas, ma ku kepe fan mok kia, e tam, i eu bi rek famteni, le i ku gow aiya kamu fasi una seleni e fan mok kia.

²⁸ Ya peteng tikin tif gam, Deo eu sangintafngi e fan tubiil ma fan fotpuris tongge ri gow.

²⁹ Sakle kalту e fotpursi e Tangwa Riis e tibi fasi ini Deo eu kepufu e tubiil kia, geinggii ma wimi ming e tam. Tubiil e sam ngongo bingne.”

³⁰ Yesus e war aiya, anwarow ri peteng ini i e mel e tangwaner saksak ilo.

Tinow ma tanga tualik ke Yesus

³¹ Lo biing tinow ma tanga tualik e Yesus ri fespuek, ri ti una male ma ri ka tuleni e sunwar usi, ini ri bur pari.

³² Singmat na galung kalту ri ka fakiisnge liflifti, ri peteng tifi aregii, “Ong, Tinam, ma tanga tuamlik ri gii ina namale, ri bur par o.”

³³ I ka gatom ri. “Se e ta tiduung, ma se e ta tuaklik?”

³⁴ I e par use tongge ri kiis falifit ini ma i e war, “Par, igii e tiduung ma tanga tuaklik.

³⁵ Se eu usi e fabur ke Deo, e ta tuaklik, fefneklik ma tidung.”

4

Warwar toftof lo kalту e sabel ine firfiran au

¹ Ming Yesus ka tofngene fabenge lo pisow e Salat Galili. Tongge ri fang liflifti ri fuun sak. I e kau bala mon ma ka kiis u tapak balik, lo sum biing a, tongge ulo anisow e dan.

² I e fabenge ine mara mok lo warwar toftof, ma lo fabenge i e war aregii,

³ “Ong! Nenge kaltu una fafaim palang e la sabel ine firfiran au kia.

⁴ Lo sumbiing e samsabel lala ine firfiran au a, fanenger ri rurung ulo sal, ma fan man ri ka sa en tike ri.

⁵ Fanenger ri rurung ulo male e fatfat nal e tibi bakir, e faf kanek saupe sak anwarow nal e tibi pinut.

⁶ Sakle biing pisii e fen kanek fan au a, ri main ma ri ka met anwarow e tek ti awawi.

⁷ Fanenger ri rurung ulo bala finfinau soksok. Ri ka faf kanek tura finfinau soksok a ma finfinau soksok a ka pismet iri, iya ri kam tibi fira. ⁸ Sakle fanenger fan firfiran au e luut ulo konona nal e faf kanek, ma e fira, fanenger e tuul e sangul, fanenger e on e sangful ma fanenger e tikii atis.”

⁹ Ma i ka war ming aregii, “Se a ka mel e ambalbalu una ongong, tafu ku ong.”

¹⁰ Biing i tibom, tura fa lo re tongge ma tikii sangful ma e u na disaipel kia, ri ka gatom usi e pimpiku e fan warwar toftof.

¹¹ Ma Yesus e peteng tifri, “Pindik lo kepmale ke Deo e sam tow tif gam. Safle tifre fa ina male, mara mok ri war ini lo warwar toftof.

¹² Usi
riu parpar ma riu tibi pari,
riu ongongni ma riu tibi ten.

Le ring gi gow, ring gi mil use Deo ma i kamu kepufu e fan tubiil kerì.”

¹³ Ming Yesus e war singri, “Gam tibi pauti e sunwar toftof gii? Areni gii gam kamu pauti e fanenger fan warwar toftof?

¹⁴ Kaltu na umume e su ngo are kaltu e sesngeni e sunwar ke Deo.

¹⁵ Fan tongge ri ngo are amfiran au e luut ulo sal. Ri su ongni e sunwar ma saupesak Satan ka gorotufu tinglo balbalri.

¹⁶ Fa ri ngo are amfiran au e luut ulo male fatfat, ri ongni e sunwar ma saupe ri kepe tura fefeal.

¹⁷ Safle ri su melmel lo borom pansumbiing, anwarow e tek ti awawi ri. Biing mafet tam fapaket e fespuek anwarow lo sunwar ri kepe, ri luut saupesak.

¹⁸ Safle fanenger ri ngo are amfiran au e luut falifu lo amfinau soksok, ri ongni e sunwar.

¹⁹ Safle ri sangfuunfuun use melmel kerì, fam fabur bakir una mel e tuba ri, ma fabur kerì lo mara mok tinglo nal, e afti e sunwar ka tibi fira.

²⁰ Fa ri ngo are firfiran au ri so lo konona nal, ri ongni e sunwar ma ri kepe, ma e fafuutngeni e amfirow, fanenger e tul e sangful, fanenger e on e sangful ma fanenger e tikii atis.”

Riu tibi tafu e lam ilo pikliu e ngiin

²¹ Yesus e gatom ri aregii, “Ou kep kau ine lam una tafu ilo pikliu e piok tam ngiin? E tam. Ou towfu lo poktow e ngiin.

²² Le sese mok e ffinuf e mu fespuek na malal, ma sese mok ri luukbobo e mu suupuek na malal.

²³ Le se a ka mel e ambalbalu una ongong, tafu ku ong.”

²⁴ Yesus e war ming aregii, “Kep famti e sunwar gam ongni, se e ikseni e sunwar tikin gii, Deo e mu gow lo, ma e mu tow ku bakir sak.

²⁵ Le se a kabuk mel Deo eu fen fuunfuun ini, ma se a ka tifik mel, sese mok i e mel lo, Deo eu kep famila singi.”

Warwar toftof lo amfiran au

²⁶ Yesus e war ming aregii, “Kepmale ke Deo e ngo aregii. Nenge kaltu e sabel ine firfiran au ulo nal.

²⁷ Panambiing ma siat, i e masun tam e kuuf, amfiran au e suar ma e faf kanek, tafen i e tibi parfat ini e faf are eni.

²⁸ Lo i tibom nal ka fafuutngeni e amfirow, baba tike e tow e auauwu, kala angkobu, wimi tuan kiruur tinglo angkobu.

²⁹ Lo biing tuan e su matuk, saupesak i e teseni ine ringgot anwarow biing na matukfaim e sau puek.”

Amfiran mastet

³⁰ Ming i e war, “Are kiar u war lo kepmale ke Deo, are e ngo, tam sese warwar toftof kiar fasi una fatofu lo?

³¹ E su ngo are amfiran mastet, e su balik sak e amfirow o so ilo nal.

³² Lo biing o so, e faf ma ka puek bakir sak ine mara au ilo bala palang, tura katkatow e lamlamsak. Talaman ri fasi una tuutpolpol ilo usi e maluuf.”

³³ Biing Yesus e sesngeni e sunwar kia tifre tongge, e gongon ine fan warwar toftof fuunfuun e bala tiin ngo, ku fasi use sinsinangu ri.

³⁴ I e gongon bingne ine warwar toftof. Biing e ta i tibom tura fan disaipel kia, e pikten ine mara mok tifri.

Yesus e porow e kif ma panaf

³⁵ Lo efef lo biing a, e war singre fan disaipel kia, “Kerek la wilo neng e galu.”

³⁶ Ri la kosngi e galung kaltu uwa, ri ka la lo mon. E mel e fanenger fan mon ming ri la tura ri.

³⁷ Kif bakir e puek ma panaf e tapii ulo bala mon e sau fatat ma ku fuun ine dan.

³⁸ Yesus ulo miu e mon e uriing lo amfatfatar ma ka masun. Fan disaipel kia ri ka fongni ma ri ka war singi, “Titsa o tibi tengis kiar, kiar sau bala maut?”

³⁹ I e matet ka porow e kif, ma e war singe panaf, “Mele boles, ngo uf.” Kala kif ka met, ma ka la siaro kausi sak.

⁴⁰ E war singe fan disaipel kia, “Usi e tamu gam ka soke sak? Gam tibi titinge?”

⁴¹ Ri soke sak, ma ri ka fagatomnge iri, “Se legii, kif ma panaf ru ka ong singi?”

5

Yesus e faliungene kaltu tangwaner saksak e sispi

¹ Ri kaupakti e Salat Galili, ri ka la ulo nal kere fang Gerasa.

² Biing Yesus e pu tinglo mon, neng e kaltu tangwaner saksak e sispi, e suu tinglo balang kenit e sa la una tupngeni.

³ Kaltu gii e melmel ilo balang kenit, ma e tek tikas, e fasi una reke ine tiam finau ma sen ming.

⁴ E fuunfuun e fam biing ri reke unlimow ma ungkekow ine finfinau ma sen, sakle ambiing nano, i e fusa e finfinau ma sen ilo ungkekow, anwarow i e rawas sak, ma e tek tikas e fasi una bingfamti.

⁵ Fam panambiing ma fan siat, i e melmel falifu lo balbalamfam ma pakpaklunmale ma ku tengteng kaukaung, ma ku bom tepi e fow ine fatfat.

⁶ Biing i e pari e Yesus ting tapaksak, i e filau ma ka la kiis pukungkek u famu ini.

⁷ I e tau bakir sak, "O bala gow e sa lo yau, Yesus Sikow e Deo aiyat? Limlim ine Deo, ini ou tibi bero yau!"

⁸ Anwarow Yesus e sau peteng tifi, "Tii tinglo kaltu gii, ona tangwaner saksak!"

⁹ Kala Yesus ka gatmo, "Sese asam?" I e koso, "Asang gii Mar ma Mar, le kemeu fuunsak."

¹⁰ Ma i e ngos lo gatmo e Yesus ini eu tibi tule ri kosngi e male a.

¹¹ Singmat na amfor na bo, ri enen uwa fatatu e mimbet lo paklunmale.

¹² Ma fan tangwaner saksak a ri ka guna e Yesus aregii, "Tule kemem use re am bo leii. A-uu lo kemem ku kau ilo ri."

¹³ I e a-uu lo ri ma fan tangwaner saksak ri ka suu tinglo kaltu a ri ka la sispi e amfor na bo a, ri

ka fafes pu ulo pimpa-i a, ri ka la of pu ulo bala dan ri ka la famautnge. E ngo are e u e mar.

¹⁴ Biing fan efefe lo fam bo ri pari e mok gii, ri filau ri ka la peteng tifre tongge ulo taon, ma ulo galu ina male ine taon, ma ri ka sa la una sa par lo sa e sau fuut.

¹⁵ Biing tongge ri puek talo Yesus, ri pare kaltu wa, fan tara ri ka sispi ma ka biilbiil e sau pilpiliis, ma kabuk sinangumel, ma ka kiiskiis. Ma biing ri pari, ri soke sak.

¹⁶ Fa ri sau pari, ri la peteng tifre tongge ine sa e fespuek lo kaltu tara e sispi. Ma ri ka seseng ming ine fam bo.

¹⁷ Biing tongge ri pari e sa e fespuek, ri war rawas singe Yesus ini eu la kosnge male keru.

¹⁸ Biing Yesus e bala la lo mon, kaltu lewa tangwaner ka sispi e la guna ini, i eu la tura.

¹⁹ Yesus e tibi a-uu lo, safle i e su war singi, "La mil ilo male use keu fumberat, ma o ku la peteng tifri ine sa Taufi e sam gow lo o, ma ine fatengis kia usi o."

²⁰ Ming kaltu a e tofng e una la seseng una Dekapolis ine fan sa Yesus e sam gow lo. Ma tongge ri ka sangfuunfuun.

Yesus e faliungene um fefin

²¹ Biing Yesus e la kaupaket mil lo mon ulo neng e galu ilo Salat Galili, singmat na galung tongge ri fang liflifti biing i uwa ulo fow e Salat Galili.

²² Neng lo re fang kaltu bakir lo felun nining asow gii Jairus e fespuek una sa pare Yesus, i e luut ulo fow e ungkekow,

²³ ma ka war fangfangteni, “Kek borom fefin e bala met. Kiskam, ya bura ini ou tow e limam ilo usi eu liu.”

²⁴ Kala Yesus ka la nami. Ma tongge fuunfuun ri ka minami, ri fasit liflifti.

²⁵ Ma e mel e neng e fefin uwa, ambuunbuunsuu e fuut lo, lo tikii sangful ma e u na matamfaim,.

²⁶ I e kepe ongker bakir sak, i e ropo e tuba tifre fan dokta ini ku liu, safle anminse e su pupuek bakir sak.

²⁷ Lo biing fefin a e su ong lo Yesus, i e fes tingnami e Yesus falifu lo re tongge ma ka pot lo kolos tapak,

²⁸ anwarow i e sang aregii, “Le ya ku su pot lo kolos tapak kia yau liu.”

²⁹ Ma saupesak ambuunbuunsuu aulo ka rop, ma i ka ongen failmi ulo piramfow ini anminse aulo e sam rop.

³⁰ Saupesak Yesus e parfat ini rawas ulo e sam la. I e didiu mil use re tongge ma ka gatom, “Se e puse lo kolos tapak kiang?”

³¹ Ma fan disaipel kia ri ka war singi, “O pari ini tongge ri fuun a inaisam, ma usi e tamu o ka gatom ini se pot lo o?”

³² Safle Yesus e alal lo ri una par ini se tikin e pot lo.

³³ Ma fefin a e parfat lo sa e puek lo, i e soke sak ma ka banban ma ka fespuek ka sa luut ulo fow e ungkekow e Yesus, ma ka peteng suupuek ine mara mok e tikin.

³⁴ Yesus e war singe fefin a, “Kek fefin, titinge kiam e sau faliunge o. La tura balamaris le mafet kiam e sam rop.”

³⁵ Biing Yesus e gongon uwa fanenger fang kaltu ri fespuek tinglo fel ke Jairus kaltu bakir lo felun nining. Ri ka sa war aregii, “Keu borom fefin e sau met, mele finiilu e titsa.”

³⁶ Yesus e ongenufu e sa ri peteng ini tife kaltu bakir lo felun nining ma ka war, “Ou tibi soke, on su titinge.”

³⁷ I e tibi taufu e tikas una minami sakle Pita, Jeims ma Jon, tualik e Jeims.

³⁸ Yesus e puek ulo male ke kaltu bakir lo felun nining, i e pari e tongge ri selfau ulo male a, tura tineng ulo e bakir sak.

³⁹ I e kau una fel, ma ka war singri, “Selfau ma tineng gii areini? Boroner gii e tibi met, e su masun.”

⁴⁰ Ma tongge a ri ka su ruur lo.

Wimi i e uun suu iri, ma i kam onu e tamow ma tinow e boroner a ma fan disaipel kia, ka la nami, ri ka la kaulek unaisa e boroner a.

⁴¹ I e puse lo limow e borom fefin a ma ka war singi, “Talita Kum,” (pimpiku lo, “borom fefin, ya peteng tifo, matet!”)

⁴² Saupe sak borom fefin a e ti ma ka fes (i e ta tikii sangful ma eu na matamfaim kia.) Ri sangfuunfuun lo sa ri pari.

⁴³ I e tow e sunwar rawas tifri, una tibi peteng tife tikas ku parfat lo mok gii, ma i e peteng tifri ini riu tow e ti tuan aiya ku en.

6

Profet e tek ti asow

¹ Yesus e la tingwa ma ka la mil ulo anwaran male kia tiim tura fan disaipel kia.

² Lo biing Sabat e fespuek, i e tofnge una fabenge ulo bala felun nining, fa fuunfuun ri ongni ma ri ka kuufsak ri ka gatom, “Kaltu gii e kepe parfat a ting iya? Sese parfat ri tow tifi, i ka fasi una gow e fan mok na tibou fuut!

³ E sam ta i ligii e kamda? E sam ta i ligii, sikow e Maria ma tualik e Jeims, Josef, Judas ma Saimon. I e tanga fefnelik ming gii tura kiar?” Ma ri balasak tikin ini.

⁴ Yesus ka war singri, “Profet e mel e asow ilo mara male, sakle ilo anwaran male kia, falifu lo re fesa ma ilo fel kia profet e tek ti asow.”

⁵ I e tibi fasi una gow e ti mok na tibou fuut wa, sakle e su tow e limow ulo borom puis kaltu ri mase ka faliungeri.

⁶ Ma i e kuufsak ini e tek ti titinge keru.

Fatiti tifre fan disaipel

Ma Yesus ka la fabenge lifit lo fan male.

⁷ I e tau ine tikii sangful ma e u na disaipel kia ka la usi, ma i ka uun temtem u iri ma ka tow e rawas tifri una feselufu e fan tangwaner saksak.

⁸ I e fatiti ri aregii. “Mele kep ti mok tura o lo fines kiam, sakle tukan. Ma eu tek ti tuan, eu tek ti tang, eu tek ti tubam ilo bala aneueu kiam.

⁹ Ou los lo su kiam, safle ou tibi kepe e u e kolos.

¹⁰ Ma lo biing ou kau bala ti fel, ou melmel wa kumuut ou la kosngi e male a.

¹¹ Ma le tikas ti male ka tibi war a-uu lo gam tam ka tibi ong sing gam, paketufu e ambalbal tinglo kekek mi biing gam la, are peteng fate tifri ini ri guuluung ine sunwar ke Deo.”

¹² Ri la ma ri ka la sesngeni e sunwar tifre tongge ini ri samusu iksi e balbalri.

¹³ Ri fesel su ire fan tangwaner fuunfuun, ma ri tow e wel ilo tongge fuunfuun ri mase ma ri ka faliungeri.

Erot e tespakti e angkiimkiim a Jon

¹⁴ King Erot e ong lo mok gii, anwarow asow e Yesus e suupuek malal. Fa ri war, “Jon kaltu una gugu tarawen, e mel e rawas ilo una bilseni e fan mok na tibou fuut, anwarow i e sau matet mil kosnge minet.”

¹⁵ Fa ri war, “I Elaisa.”

Ma fa ri war, “I na profet, e ngo are fam profet tingna ngen.”

¹⁶ Safle biing Erot e ong lo mok gii, i e war, “Jon, kaltu ya tespakti e angkiimkiim aiya, e sau matet mil kosnge minet.”

¹⁷ Erot tibom e tow e sunwar una pusefamti e Jon ma i e rekfamti ma ri towfu ulo rerek. I e gow e mok gii, anwarow lo Erodias, wok ke tualik Filip, i e tili famu.

¹⁸ Jon e war singe Erot, “E tibi riis use fan fafanau ini o tili e wok ke tuamlik.”

¹⁹ Erodias e balasak tikin ine Jon e bura ini eu paketmet ini, safle i e tibi fasi una gow,

²⁰ anwarow Erot e sokeni e Jon, ka fakale lo, i e parfat lo ini e riis ma e ta kaltu pepe. Biing Erot

e ongni e Jon e war singi, i e sangfuunfuun, safle i e su fefeal una ongne singi.

²¹ Wimi e mel e konona biing ke Erodias e puek, ri sangfi e biing Erot e fuut. I e gow e en tura ge lamlam, ma ge lamlam lo re ge na fapaket ma tongge lamlam tingna Galili.

²² Biing fefin ke Erodias e kaulek ka guui, fefin a e terngeni e bala e Erot ma ge lamlam ulo en a. King ka war singe borom fefin a, "Gatom yau use sese ti mok o bura ma ya ku tow tifo."

²³ Ma ka limlim tifi, "Tikin sak ow gatom yau ine ti mok, yau tow tifo, le oku peteng ini o bura e ti galu lo ninsiing ilo bala kepmale kiang, yau tow."

²⁴ I e la suu ma ka war singe tinow, "Sa yau gatom usi?"

Ma tinow ka war, "Paklu e Jon kaltu na gugu tarawen."

²⁵ Saupe sak fefin a e saupe ka la unaisa e king tura fabur kia. "Ya bura ini ow tow tif yau gii sekit e paklu e Jon ilo bala ti dis."

²⁶ King ka sangfuufuun tikin, ma ka sangkuu-luung, safle anwarow lo limlim kia na matre ge lamlam kia ulo inen, i e guuluung una onguf singe fefin a.

²⁷ I e saupesak ka onu e kaltu na tetes pakpak-lung kaltu, tura sunwar una kepmil ine paklu e Jon. Kaltu a e la, ka la teseni e paklu e Jon ulo felun rerek,

²⁸ ma ka kepmil ine paklu ulo bala dis. I e tow tife fefin a, ma fefin a ka tow tife tinow.

²⁹ Biing ri ong lo, fan disaipel ke Jon ri puek ri ka la kepe punumfow ma ri ka la towfu ulo ampolo.

Yesus e fenre e lim e mar

³⁰ Fan apostel ri tiim falifit ine Yesus, ma ri ka peteng tifi ine mara mok ri sam gow ma ri sam fabenge ini.

³¹ I ka war singri, “Gam kasa nami yau gam tibom kiar ku la ilo ti mok e tek tikas ilo, gam ku la kepe ti boron manau.” Anwarow tongge fuunfuun ri mil faliu ka la tek ti sol keru una en.

³² Ri tibom ri ka la lo mon ulo mok e tek tikas ulo.

³³ Safle tongge fuunfuun ri la iliim ri, ma ri ka filau tinglo fan male keru, ri ka la puek famu iri.

³⁴ Biing Yesus e masa ma ka pari e galung kaltu bakir sak, bala e la kuuluung sak usi ri, anwarow ri ngo are fan sipsip e tek ti efefe keru. I e tofnge una fabenge singri lo mara mok.

³⁵ Biing pisii e sau bala suu fan disaipel ri ka puek ta lo. Ri ka war singi, “Kiar ilo biilkap legii, ma e sau bala or.

³⁶ Uunre tongge a ri ku la, usi riu la ilo fan male fatat ri ku la feli e ton tuan una en singri.”

³⁷ Safle i e koso singri, “Gam tow e ti mok una en singri.” Ri ka war singi, “Eu kepe e wal e funiil ke kaltu una kepe fimfiil kia una feli e ton tuan are ge gii. Areni, kiar u bas ine fimfiil ming gii lo beret, ma kiar ku tow tifri una en?”

³⁸ Yesus e gatom ri, “E fis e beret ami? La par.”

Biing ri la sik ri pari, ri kasa peteng, “E lim e beret ma e eu e fis.”

³⁹ Kala Yesus ka peteng tifri una uunre tongge ri ku kiis lo fam forfor ilo garas makrau.

⁴⁰ Ri kiis lo fam forfor lo tikii atis ma fa e lim e sangful.

⁴¹ I e kepe e lim e beret, ma e u e fis ma ka par uiat wilo balambat, ma ka aro singe Deo, bingpaki e beret ka tow tife fan disaipel kia, una ti ini lo re tongge. I e ti ming ine um fis lo ri nano.

⁴² Tongge nano ri tiin en ri ka la sut.

⁴³ Ma fan disaipel ri ka sele tiim ine tikii sangful ma e u na dik e fuun lo fan susun beret ma fis.

⁴⁴ Ma ri westiim ire antamat ri en, e ta e lim e mar, ma gelefin ma berberat fuunfuun ming ri en.

Yesus e fes ulo poktow e salat

⁴⁵ Saupesak Yesus e uunre fan disaipel kia ri ka la lo mon ri ka la famu una Betsaida, ma i kabi un familre tongge.

⁴⁶ Wimi ri la kosngi, i e la kanek ulo galu lo paklunmale una la nining.

⁴⁷ Biing e sam efef, mon e sam ta ulo falifu lo salat Galili ma i tibom uwa una kiin.

⁴⁸ I e pari e fan disaipel kia ri tafiis rawas lo mon, anwarow kif e kife ri. E ngo are e fet anmatam pisii lo enene i e la usi ri. I e fes ulo poktow e salat. I e bala fes soliu ri,

⁴⁹ safle biing ri pari i e fes ulo poktow e salat, ri sangfi ini kenit. Ri ka la kaung bakir sak,

⁵⁰ anwarow ri nano ri pari, ma ri ka soke sak ini. Saupesak i e gon sing ri. "Balamas, Yau le gii. Gam u tibi soke."

⁵¹ Kala Yesus e kau ulo bala mon tura ri ma kif e met, le ri su la sangfuunfuun,

⁵² anwarow ri tibi pauti e bala tikin e fafen a Yesus e gow lo e lim e mar na tamat. Balbalri e kut.

⁵³ Biing ri kaupaket ri of masa una Genasaret ma ri sangfamti e mon wa.

⁵⁴ Biing ri pu tinglo mon saupesak tongge ri sam ilmi e Yesus.

⁵⁵ Ri filau ka la ulo male kiruur una kepre tongge ri mase lo fan ngiin ri ka la ulo male ri ong ini i ulo.

⁵⁶ Ma sese male i e la ilo, ilo taon, tam keptin male, ri taufre tongge ri mase ulo fan male na tiim. Ri gatom rawas ini riu su puse lo anisow e kolos tapak kia. Ma seri a ri puse lo, riu liu.

7

Kalkaliis ma e tibi kalkaliis

¹ Fam Farasi ri keptiim iri tura fa lo re fan titsa lo fafanau. Ri ka la tingna Jerusalem, ri kasa puek ri ka la pari e Yesus.

² Ma ri pari e fa lo re fan disaipel kia ri en tura limlimri e tibi kalkaliis.

³ (Fam Farasi ma fan Juda nano, ri ususi e ninis kere tumtumleri. Le riu tibi gua fakausi e limlim ri, riu tibi en.

⁴ Biing ri mil tinglo male na umat ma ri ku tibi fagu, ri tibi fasi una en. Ma ri usi e fan nenger fan sinang fuunfuun ming, ri sam kepe singre tuptup ri, aregii. Riu gugua e fang kap, fan sospen ma fan dis.)

⁵ Ma fam Farasi ma fang titsa lo fafanau, ri ka gatmo e Yesus aregii, “Usi e tamu gii fan disaipel

kiam ri ka tibi ususi e fan ninis kere tuptuprer, limlim ri e tibi kalkaliis ma riu su en?"

⁶ Ma Yesus ka peteng tifri aregii, "Aisaiya e sam war warfot lo gam tikin, ini gam na ge na kepkepe na matam pankii. I e sam seti e sunwar kia aregii, 'Tongge gii ri resresnge yau ilo ngusngusri ri, safle balbalri ma singnanguri e sinsinanguri e ta tapak i yau.

⁷ Ri nining fofoes lo yau, sakle fam fabenge keru, e su ta fam fabenge ke kaltu.'

⁸ Gam sangintafngi e fafanau ke Deo ma gam ka puse raw lo ninis kere tongge."

⁹ Ma Yesus ka war singri ming aregii, "Gau parfat sak una sangeufu e fam fafanau ke Deo. Ma gam ka usi e sinangumi tibom.

¹⁰ Moses i sam war, 'O samusu nawen singe tamam ma tinam, ma kaltu e gow e sunwar saksak talo tamow ma tinow e samusu met.'

¹¹ Sakle gam war aregii, 'Le ti kaltu ka mel e mani tam sa una ulsi e tamow ma tinow, sakle kusu peteng tifru "mani gii ya sau fagati una tow tife Deo."

¹² Kaltu gii eu tibi gow e ti mok una ulsi e tamow ma tinow.'

¹³ Aregii gam ususi e ninis kemi gam kepe singe tumtumlamu, ma gam ka par pu ine sunwar ke Deo ma gau parfat una gow e fan mara mok aiya."

¹⁴ Ma Yesus ka tau ming ine galung kaltu ma ka peteng tifri aregii, "Gam nano ongni e sunwar kiang ma sang kausi.

¹⁵ Mok e mel ina male lo tikii kaltu, ma ka kau ina fel lo, e tibi fasi una gow e kaltu ku tibi kalkaliis. E tam, fan mok e mel ina fel lo kaltu,

ma ka suu ina male, i mung gii ka gow e kaltu ka tibi kalkaliis.”

¹⁶ *

¹⁷ Wimi Yesus e la kosnge galung kaltu a, ma ka la ulo fel. Ma fan disaipel kia ri ka gatmo use anwarow e sunwar toftof a.

¹⁸ Ma i ka peteng tifri aregii, “Kemi ming e tek ti sinangumi be? Ya sang ini gam tibi parfat, fan mok e mel ina male lo kaltu ma ka kau ina fel lo, i e tibi fasi una gow e kaltu ku tibi kalkaliis.

¹⁹ Ya war aregii, anwarow lo fan mok aiya, e tibi la tikin ilo balang kaltu, e tam. E fes ilo sakow, ma wimi kau pu lo fel balik.” (Lo sunwar gii, Yesus e war aregii, lo fan mara tuan e kalkaliis na mata e Deo.)

²⁰ Ma Yesus e war ming aregii, “Mok ilo balang kaltu ma ka suu, eu gow e kaltu ku tibi kalkaliis.

²¹ Anwarow fan sinang a, e la tinglo balang kaltu, i e fan sinang are sangsang saksak, sinang e du, sinang na kinau, ma sinang na paketmet ine kaltu.

²² Ma sinang e du tura fan tinaule, sinang na mer, sinang na bero, ma sinang na guruh, sinang na kayan falek, ma sinang na balasak ma war saksak talo re fa ma sinang na bom resresgneri ma sinang na lomba.

²³ Fan mara sinang saksak e mel ilo bala e kaltu ma ka suu, e gow e kaltu ka tibi kalkaliis na anmata e Deo.”

Titinge ke wok tingna Grik

* **7:16 7:16** Fa lo re tongge parfat ri sangfi ini e mel e neng e su ming ilo 7:16. Sunwar a e ngo aregii, “Le se a ka mel e ambalbalu una ongong, tafu ku ong.”

²⁴ Yesus e matet ka la kosngi male a, ma ka la ulo taon Tair ma fan male liflifti, ka la kau ulo bala fel. E tibi bura ini tikas eu parfat lo. Safle e tibi fasi una keskum, e tam.

²⁵ Nenge fefin e ong ini Yesus e sam ta wa. Ma fefin a ke tiner e mel e tangwaner saksak e mel ulo. Fefin a e puek saupesak, kasa punungkek fatatu e kekow e Yesus.

²⁶ Fefin a e ta Jentael. I e fuut una Fonisia ilo kaontri Siria, i e sa gatom rawas ine Yesus ini e samusu fesi e tangwaner saksak tinglo ke fefin.

²⁷ Ma Yesus ka war singi aregii, “Kemem samusu tow e tuan are berberat famu. Are kemem kam kepe tuan are berat ma kemem ka bas ini tife fam puul.”

²⁸ Ma fefin a e koso e sunwar kia aregii, “Taufi, safle fam puul ri mel ilo pikle fate ri ming, ri sikmeru e fan susuntuan are berat.”

²⁹ Ma Yesus e war singi, “O fasi una la, tangwaner saksak a, e sam la kosnge sikuam. Anwarow o sam kos fakausi e sunwar kiang.”

³⁰ Ma fefin a ka la mil ulo fel ma ka pari e sikow e ngongo ulo ngiin ma tangwaner saksak a e sam la kosngi.

Kaltu ambalbalu e kut ma angkermow e sok

³¹ Kala Yesus ka la kosingi e galu ina Tair ma ka la ulo galu lo taon Saidon ma ka la sekit ulo galu ina Dekapolis ma ka puek ulo galun salat Galili.

³² Ma ri sa tafu e neng e kaltu tifi ambalbalu e kut ma angkermow e sok, ma i e tibi warwar kausi. Ma ri ka gatmo e Yesus una tow e limow ulo kaltu a.

³³ Ma Yesus ka unu e kaltu a, kala kosing galung kaltu a, ma Yesus ka tow e uang katan limow ulo uam balbalu. Ma wimi Yesus ka kansu e antelen limow tibom, ma ka pot lo angkermow e kaltu a.

³⁴ Ma Yesus ka par wiat ulo balambat, ka mangeuf, ma ka peteng tifi e kaltu a aregii, “Efata!” (pimpiku ipiik.)

³⁵ Ma saupesak ambalbalu e kaltu a ka ten, ma mok e kali e angkermow ka tamini ma i ka tofnge una war ten.

³⁶ Ma Yesus ka war kale re tongge, ini riu tibi peteng tife tikas ine mok gii ri ka pari. I e war kale ri tikin. Safle e tam. Ri raw tibom una peteng ine sunwar a.

³⁷ Ma tongge a ri ka ongni e sunwar a ri kuufsak tikiin ma ri ka war, “Fan mara mok e gow e terernge ri, e gow e balbaluri kut ri ka fasi una ong, ma ngusngusri ri kut ri ka war.”

8

Yesus e fenre e fet e mar

¹ Lo biing a, tongge ri sa tiin mil ma e tek ti tuan ari, ma Yesus ka tau ine fan disaipel kia ri ka puek. Ma ka peteng tifri aregii,

² “Ya tengis re tongge gii, anwarow ri melmel tura yau lo e tuul e biing. Ma e tek ti tuan una en sing ri.

³ Le ya ku tule familri wilo fan fel kerri ma ri ka biis, matmat ri eu la belbelil ma ri ku luut ailo sal, fa ri sau fes ting tapak ri ka puek.”

⁴ Ma fan disaipel kia ri ka koso aregii, “Safle kiar i tapak ine taon. Ma kiar ku kepe beret ting iya, una fenre tongge gii?”

⁵ Yesus ka gatom ri, “E fis e beret ami aiwa?” Ma ri ka koso, “Baba fis.”

⁶ Yesus ka war singri una kiis ilo nal. Ma ka kepe baba fis na beret a, ka katfarsi e Deo, ma ka paekpaki ka tow tife fan disaipel kia una fasa ini lo re tongge.

⁷ Ma ri mel lo tom boron fis ming. Ma Yesus ka katfarsi e Deo ma ka uunre fan disaipel kia una fasa ini lo ri.

⁸ Biing tongge ri en ri kala suut, wimi, fan disaipel ri kam bastiim ine fan susuntuan ari talo baba fis na dik.

⁹ E ngo are e fet e mar na tamat ri puek, wimi i kam tulen ri ka la,

¹⁰ ma ka kiis ulo mon tura fan disaipel kia. Ma ri ka la ulo galu lo male Dalmanuta.

¹¹ Fam Farasi ri puek ri ka sa tofo e Yesus. Ri ka gatmo ini eu bilseni e ti tintof tinglo balambat.

¹² Yesus e ongni e mafet ulo bala ma ka war, “Anwarow lo sa kulu lo biing gii, ri ka gatom una pari e ti tintof? Ya peteng tikin tif gam, ri tibi fasi una pari e ti tintof, e tam sekit.”

¹³ Ma i ka la kosing ri ka la kiis mil lo mon, ma ka la ulo galu lo salat Galili.

Is ke Erot ma fam Farasi

¹⁴ Fan disaipel kia ri sangintafngi una kepe ti tuan ari. Sakle mel e tikii beret uwa ulo bala mon.

¹⁵ Ma Yesus ka war rawas singri aregii, “Gam u ate use is kere fam Farasi ma Erot.”

¹⁶ Fan disaipel ri fagon faliu i ri tibom aregii, “I e gow e sunwar ngan gii, anwarow e tek ti beret.”

¹⁷ Yesus e parfat lo fawar a ri gow. Ma ka war singri aregii, “Areni gam ka fagon aiya? E tek ti

beret arer? Ya sang ini gam tifik ten. Ya sang ini balbalmi e kut be?

¹⁸ E mel e matmat mi sakle gam tibi parpar, e mel e balbalumi sakle gam tibi ongong? Gam sam sangintafngi, be?

¹⁹ Biing ya pakii e lim e beret lo e lim e mar na tamat, e fis e dik gam sengi lo fan tuan e ngo sok?" Ri ka peteng tifi, "Sangful ma eu."

²⁰ "Ma lo biing ya pakii e baba fis na beret lo e fet e mar na tamat, gam sengi e fis e dik lo fan sun tuan e ngo sok?" Ma ri ka koso, "Baba fis na dik."

²¹ I ka war singri aregii, "Gam tifik parfat?"

Yesus e faliungeni e kaltu baf

²² Yesus tura fan disaipel kia ri la fespuek ulo male Betsaida, ma fa fan tongge ri ka tow e neng e kaltu tifi, anmata e kut. Ma ri ka peteng tifi e Yesus ini eu tow e limow ulo kaltu a.

²³ Yesus e puse lo limow e baf a, ma ka onu ru ka la ulo galu una male ine keptin male a, ma biing e kansu e anmata, ma ka tow e limow ulo ma ka gatmo aregii, "O pari e timok, tam e tam?"

²⁴ Ma kaltu a ka par ma ka war aregii, "Ya pari e tongge sakle ya pari are fan au ri fes ri kala."

²⁵ Ma Yesus ka tow mil e limow ulo anmata ma kaltu a ka par rawas mil. Ma anmata ka kausi mil ma ka pari e fan mara mok nano e la fespuek ten.

²⁶ Ma Yesus ka onu ka la mil ulo ke fel ma ka fanow, "Ou tibi la ilo male a."

Pita e peteng suupuek ine Yesus

²⁷ Yesus e matet tiim tura fan disaipel kia, ma ri ka la ulo male fatatu e taon Sisaria Filipai. Ma ulo

sal e am la gatmo e fan disaipel kia aregii, “Tongge ri petpeteng ini yau se tikin?”

²⁸ Ma ri ka koso singi aregii, “Fa ri peteng aregii, o Jon kaltu una gugure tongge. Ma fa ri ka war, o Elaisa, ma fa ri ka peteng ini o na profet.”

²⁹ Ma Yesus ka gatom ri aregii, “Ma gam tibom gau peteng ini yau se?”

Ma Pita ka koso e sunwar kia aregii, “O na Mesaiya.*”

³⁰ Ma Yesus ka fanauri ini riu tibi peteng tife tikas ini i se.

Yesus e peteng fate ine minet kia

³¹ Yesus e tofngeni e fabenge kia tifle fan disaipel kia aregii, “Sikow e Kaltu e samusu kepe fan mara ongker. Tongge lamlam, fam paklure fam pris ma fang titsa lo fafanau riu gilmeufu ma ri ku pakti ku met. Ma lo biing baba e tuul i eu matet mil.”

³² I e peteng ten tifri aregii, ma Pita ka onu e Yesus ka la ulo galu, ma ka la porow.

³³ Ma Yesus ka didiu mil use fan disaipel kia, ma ka porow e Pita aregii, “Satan on la mil u nami yau. O tibi usi e sinangu e Deo, e tam. O su usi e sinsinangure e tongge mung.”

³⁴ Ma Yesus e tau tiim ire tongge tura fan disaipel kia ri ka sa la usi, ma ka peteng tifri aregii, “Le ku mel e tikii tikas eu fabur una mi nami yau, i e samusu faporo e fabur kia tibom. Ma e samusu kepe aupaket kia ma ku usi yau.

* **8:29 8:29** Mesaiya e ta kaltu Deo e wele una kepfamilre tongge kia. Mesaiya bala e su ngo are as gii Kristus.

³⁵ Anwarow le sese ti kaltu a ka sangsang una bingfamti e ninliu kia tibom, ninliu kia eu tam ini. Safle se a ku fafen ine ninliu kia usi yau tura konona sunwar, i eu kepfamila e ninliu kia.

³⁶ Sese kausi le kaltu ku kepe mara mok nano gii lo nal, sakle ninliu kia tibom eu tam ini?

³⁷ Kaltu e tibi fasi una tow e fimfiil una fil famila e ninliu kia.

³⁸ Le tikas ku maiyai lo yau ma kek sunwar gii lo inlen na fapue ma tumtubiil gii, Sikow e Kaltu eu maiyai lo, lo biing i eu puek tura finaswen ke Tamow, tiim tura fan angelo riis kia.”

9

¹ Ma Yesus ka peteng aregii tifri, “Ya peteng tikin tif gam. Fa lo re tongge gii ri ka titi gii riu tifik met, ku muut riu pari e Kepmale ke Deo eu fespuek tura singmat na rawas kia.”

Fow e Yesus e ikis ka ngo kuriik

² Wimi ine e on e biing Yesus e onu e Pita, Jeims ma Jon ri ka la ulo paklunmale e kanek sak. Ma ri tibom ri ka melmel. Ma sumbiing a ri pare fow e Yesus e ikis ka puek ka ngo kuriik.

³ Malu e fespuek ka murmur sak are anten. E tek ti kaltu gii lo nal eu fasi una gow e ti kolos ku murmur aregii.

⁴ Ma Elaisa tura Moses ru puek nanmatri, ru ka sa gongon singe Yesus.

⁵ Pita e pari fan mok a ma ka peteng tife Yesus aregii, “Titsa, e kausi kiar ka ta gii. Kemtuul fasi una gow e tuul e kak. Neng kiam neng ke Moses ma neng ke Elaisa.”

⁶ Pita e tibi parfat ini are eu war, usi ri tuul soke sak.

⁷ Kala pambalbal ka fespuek ka afit ri. Ma neng e angkiimkiim tinglo bala pambalbal a, e war aregii, "I gii e sikuang ya bura sak. Gam u ongong singi."

⁸ Saupesak ri ka par falek, ma ri tibi au par tikas tura ri. Safle Yesus tibom tura ri.

⁹ Ri ding tinglo paklunmale, ma Yesus ka fanauri aregii, "Gam u tibi peteng tife tikas ine mok gam sau pari. Ku muut lo biing Sikow e Kaltu eu matet mil kosnge minet."

¹⁰ Ri ka kepfamteni e sunwar a, ma iri ka fawar u falifu iri tibom aregii, "Sunwar gii, matet mil kosnge minet, e ta sa?"

¹¹ Ma ri ka gatmo e Yesus aregii, "Usi e tamu fang titsa lo fafanau ri ka petpeteng ini Elaisa e buk puek?"

¹² Yesus ka koso e singri aregii, "Sunwar a e tikin, Elaisa e samusu puek famu una fariis famila e fan mara mok. Sakle areini lo sunwar gii lo buk ke Deo ka peteng Sikow e Kaltu e samusu kepe mara ongker, ma ini tongge ri ku fotpursi?"

¹³ Sakle ya peteng tif gam aregii, Elaisa e sau puek. Ma tongge ri ka usi e fabur kerri tibom ri ka gow e fan mara sinang lo, are sunwar e mel ilo buk ke Deo."

Bo-i ine tara saksak ulo

¹⁴ Biing Yesus tura e tuul neng lo re fan disaipel kia ri la puek talo re fa lo ri, ri ka pari e singmat na galung kaltu ri fang liflifit ri, ma fa lo re fan titsa lo fafanau ri ka fafatinge tura ri.

¹⁵ Biing tongge nano gii ri pari e Yesus e puek, ri la faof sak usi, ri ka filau ri ka la areni.

¹⁶ Yesus ka gatom ri, “Gau fafatinge use sa?”

¹⁷ Nenge kaltu una balri ka koso aregii, “Titsa, ya sa tow e sikuang tifo. Tara saksak e sispi ka tibi warwar.

¹⁸ Biing eu fuut lo, eu bas ini lo nal ku la busbus e ngusu, ma ku la gekgek e ngisngisa. Ma kamu la rawas sok. Ya gatom re fan disaipel kiam una pete na tara lo, sakle ri tibi fasi.”

¹⁹ Yesus e ongni e sunwar a, ka war singri aregii, “Gam na kulu na tibi titinge, sinangumi ma ninis kemi e tibi kausi, e sak sekit. E fis e biing yau melmel tura gam? Ma e fis e biing ming yau kepe mafet tura gam? Gam tow e boroner a wagii!”

²⁰ Ri ka tow e boroner a tifi. Ma biing tara saksak e pari e Yesus, i e saupesak ka belbel ine boroner a ka luut ufaf ka la kiitkiit lala, ma ka la suusuu e bus na ngusu.

²¹ Yesus ka gatmo e tamow e boroner a, “I e melmel aregii tingnangis?” Ma tamow ka koso aregii, “Tofnge tinglo biing e balik uwa.

²² Toneng tom biing eu bas ini talo bala iif tam bala dan una pete met ini. Ma le o ku fasi una gow e ti mok, on tengis kemem ma o ku ules kemem.”

²³ Yesus ka war aregii, “O gatom ini, le ya ku fasi? E tek ti mok eng kala singe kaltu e mel e titinge kia.”

²⁴ Ma saupesak tamow e boroner a ka tau aregii, “Ya titinge, safle titinge kiang e pospos, o samusu ules yau.”

²⁵ Biing Yesus e pari e tongge fuunfuun ri filau una la par, i ka porow e tara saksak a aregii, “Ona

tangwan ngusu kut ma balbalu kut Ya peteng tifo, o samusu tii kosnge boroner gii, ma o mu tibi sispi mil.”

²⁶ Ma tara saksak a ka la kaung ma ka bele saksak ine boroner a, ma ka la kosngi. Ma boroner a kasu la ngosok are e sau met, iya fa fuunfuun ri ka peteng ini e sau met sekit.

²⁷ Safle Yesus e puse lo limow ma ka famtete ka ti.

²⁸ Wimi Yesus ma fan disaipel kia, ri tibom ri melmel una fel ma ri kam gatmo aregii, “Usi e tamu, kemem ka tibi fasi una feselufu e tara saksak lewa?”

²⁹ Ma i ka peteng tifri, “Sinang una nining tibom e fasi una tii ine matan tangwaner aiya, e tek tikas ti sal ming.”

³⁰ Ri ka la kosnge male a ma ri ka fes ulo male Galili. Yesus e tibi bura ini tikas ini eu parfat ini ri uya,

³¹ anwarow, i e fabenge singre fan disaipel kia, ka peteng tifri aregii, “Sikow e Kaltu riu solamufu ku la ilo limre tongge, ri ku paketmet ini. Ma lo biing baba e tuul i eu matet mil.”

³² Sakle ri tibi pauti e pimpiku e sunwar Yesus e peteng ini tifri, ma ri soke una gatmo usi.

Se eu bakir

³³ Ri ka sa puek una Kapenaum. Ma biing ri ka ta ulo bala fel, Yesus ka gatom ri, “Sa lewa leii gau fatinge lala usi ulo sal?”

³⁴ Sakle e tet borong sok lo ri, usi ri fatinge lala use se e bakir.

³⁵ Yesus ka kiis uf ma ka tau ine tikii sangful ma eu na disaipel kia usi ma ka war, “Le tikas ku

bur famu, i e samusu mi sekit, ma ku ta kaltu na faules singri nano.”

³⁶ I ka onu e neng e boroner ma ka sa fetiufu falifu iri, ma ka ofeni, ma ka peteng tifre fan disaipel kia aregii,

³⁷ “Sese kaltu e areni e boroner are boroner gii lo asang, i e are yau, ma se a ka are yau, e tibi are yau mung, safle i e areni ming e se gii tule yau.”

Se a ka tibi is kiar

³⁸ Jon e war, “Titsa, kemeu pari e kaltu e fesi e fan tara saksak lo asam, ma kemem ka peteng tifi ini eu manau, anwarow e tibi ta ilo kiar.”

³⁹ Yesus ka war singri, “Mele warkali, le tikas ku gow e ti mok na tibou fuut lo asang, wimi i e mu tibi fasi una war ine ti mok saksak saupe una bero yau.

⁴⁰ Sese kaltu a ka tibi is kiar e ta ilo kiar.

⁴¹ Ya peteng tikin tif gam, sese kaltu eu tow e dan mair tif gam lo asang, anwarow gam ke Kristus, i eu kepe fimfiil.

Pete luut ine neng talo tubiil

⁴² “Le tikas ku gow e ti boroner gii ka titinge lo yau ma ku luut lo tubiil, i eu kepe mafet e bakir iyat, le ri ku kawi e ti fat bakir ilo angkongkongow ma ri ku fauli ina kasap.

⁴³⁻⁴⁴ Le limam ku tatfe o wilo tubiil, tese pakti. E fasi ini ou tuk ma o ku la ilo male na ninliu are ka u e limam ma o ka la ilo male na ongker iya iif e tibi metmet.

⁴⁵⁻⁴⁶ Le kekem ku tatfe o wilo tubiil tese pakti. E fasi ini ou tuk ma o ku la lo male na ninliu, are ka u e kekem ma o ka la ilo male na ongker.

⁴⁷ Ma le anmatam ku tatfe o wilo tubiil, o samusu sipil ufu. E kausi sak ini eu mel e tikii anmatam ma o ku la lo Kepmale ke Deo, are ka u e anmatam, ma ri kau bas i o lo male na ongker,

⁴⁸ iya

‘fang kirkiriaf lo ri ka tibi metmet,
ma iif ilo ka tibi fasi una met.’

⁴⁹ Ri towtow e semek ilo fan mara finafen una gow ri ku kalkaliis na mata e Deo. Are mafet e puek are iif, una tererngere tongge.

⁵⁰ “Tiif lo semek e kausi, sakle le ku rop e tiif lo, are eu gow ku semek mil? En samusu mel e tiif lo gam, ma gam ku melmel tura balamaris falifu i gam.”

10

Sinang una kere antinaule

¹ Yesus e matet ka la kosnge male a, ka la ulo galu ulo distrik Judia ma ka la ulo galu lo Dan Jodan. Ma tongge fuunfuun ri kasa tiim mil tura ma ka usi e ninis kia una sesngeni e sunwar kia tifri.

² Ma fam Farasi ri ka sa la use Yesus ri bur sa tofo ri ka gatmo aregii, “Fafanau kiar e awuu lo kaltu e fasi una kalafeni e ke wok, tam e tam?”

³ Yesus ka koso e gatgatom kerii aregii, “Moses e tow e sese fafanau tif gam?”

⁴ Ri ka war, “Moses e a-uu lo kaltu e fasi una seti e pampel una kere antinaule ku tow tife fefin a ma ku onu ku la.”

⁵ Sakle Yesus e peteng tifri aregii, “Gam na tongge balbalmi e kut, ilea Moses kam seti e fafanau a ka tow tif gam.”

⁶ Ong! Nangen sak biing Deo e fafuutngeni e fan mara mok, i e gow e tamat ma fefin.

⁷ Aregii kaltu ka la kosnge tamow ma tinow kasa tiim tura ke wok,

⁸ ma ru ka ta tikii foru, ma ru kamu tibi melmel are ru, E tam. Ru puek are tikii foru.

⁹ Aregii mok Deo e sam war famti, kaltu e tibi fasi una kere.”

¹⁰ Wimi Yesus ma fan disaipel kia ri ka la mil ulo fel, ma ri ka la gatmo use sunwar lo kere antinaule.

¹¹ Ma ka peteng tifri aregii, “Le kaltu ka fingeni e ke wok, ma ka la tili e neng e fefin, kaltu e e sam tubiil lo ke wok, ma e sam gow e sinang na faet falek.

¹² Male fefin ku fingeni e ke matuk ma ku la tili e neng e kaltu, fefin a e gow e sinang na faet falek.”

Yesus ma berberat

¹³ Tongge ri la tura berberat keru use Yesus. Ri bura ini eu la pose lo ri, sakle fan disaipel kia ri pari, ri ka war paket singri.

¹⁴ Yesus e pari, ma bala ka sak, ka peteng tifre fan disaipel kia aregii, “Gaman tauf re berat ri ku sa la usi yau. Gam u tibi kale ri. E tam. Kepmale ke Deo e ta kere matang kaltu are berat gii.

¹⁵ Ya peteng tikin tif gam, le ti kaltu ku tibi kepe e kepmale ke Deo, are berberat gii, eu tibi fasi una la kau ilo. E tam sekit.”

¹⁶ Ma ka kepe re berberat a ka tow e limow ulo ri ma ka war fakausi ri.

Kaltu tuba mel

¹⁷ Yesus ka matet ka la, ma neng e kaltu ka filau puek kasa pukungkek na mata, ma ka gatmo aregii, “Konona titsa, yau gow e sa usi yau kepe ninliu bingne?”

¹⁸ Yesus ka peteng tifi aregii, “Usi e tamu o ka foteng yau ini ya kausi? Deo i tibom e kausi.

¹⁹ O sau parfat lo sunwar lo fafanau. Gam u tibi paketmet ire tongge. Gam na fatfat maksi, gam u tibi gow e sinang na faet falek, gam u tibi kinau, gam u tibi gurum ma sesuupuek fofoes ire tongge. Gam u tibi fasorom ma es fofoes ine fan mok kere fa. Gam samusu nawen singi e tautaumi ma tintinmi.”

²⁰ Ma kaltu a ka peteng tife Yesus aregii, “Titsa, biing ya boroner uwa ka sa muut gii, ya ususi e fan fafanau nano gii.”

²¹ Yesus e bura sak ka par usi ma ka peteng tifi aregii, “O pospos aiwa lo tikii mok. Ou la umat ine fan mok kiam, ma mani o ka kepe o samusu tow tifre tongge sasngal. Ou gorot aiya, usi ou mel e konona tubam tikin ilo balambat, ma o ku usi yau.”

²² Kaltu a ka ongne sunwar gii, ka la par saksak e mata ma ka la sang kut ma ka la, anwarow, tuba e bakir tikin.

²³ Ma Yesus ka par use re fan disaipel kia ma ka war, “Tongge tuba mel, e tuntun sak singri una la kaulek ilo kepmale ke Deo.”

²⁴ Ma fan disaipel ri ka kuufsak lo sunwar kia. Sakle Yesus e peteng tifri ming aregii, “Berat, e tuntun sak singe kaltu una kaulek ilo kepmale ke Deo, eu faim tuntun.

²⁵ E tikin e tuntun singe kamel una los ilo amfur lo nil na somsomap, sakle e tuntun tikin iyat singe kaltu tuba mel una kaulek ilo bala kepmale ke Deo.”

²⁶ Fan disaipel ri ka kuufsak tikin ri ka fawar falifu iri tibom aregii, “Le ku ngo aiya, ma se gii kamu su fasi una kau ilo ninliu bingne?”

²⁷ Ma Yesus ka par usi ri ma ka war, “Kaltu tibom e tibi fasi. Sakle Deo e fasi. Deo e fasi una gow e mara mok.”

²⁸ Pita ka peteng tife Yesus aregii, “Par, kemem sam la kosnge mara mok ma kemem ka mi nami O.”

²⁹ Ma Yesus ka war, “Ya peteng tikin tif gam, kaltu eu la kosnge fel, tam tanga tualik, tam tanga fefnelik, tam tinow, tam tamow, tam berberat kia, tam fam palang kia, usi yau ma konona sunwar,

³⁰ kaltu a eu kepe atis ming ilo poktow e fan mok a ka la kosngi biing i e melmel gi wa gii lo nal, anwarow Deo eu feni ine fan mok fuunfuun tikin, iyat ine fan mok i e mel lo famu. I eu kepe fam fel fuunfuun eu fuun e fan tualik fam fefnelik fan tintinow fan siksikow ma fam palang fuunfuun. Ma ming tongge riu isa. Ma lo biing e mu puek wimi, i e mu kepe ninliu kausi bingne.

³¹ Sakle tongge a ri ka kep bakir lo ri gii, riu mi. Ma seri gii ri ka mi, riu famu.”

Yesus e familia e warwar lo minet kia

³² Yesus tura fan disaipel kia ri fes ulo sal una la una Jerusalem ma Yesus e famfamu lala iri. Fan disaipel kia ri sangfuunfuun ma tongge ri mi nami ri, iri soke. Ka uunre tikii sangful ma e u na

disaipel kia ri ka la ulo galu, ma ka peteng tifi mil ine fan mok e mu fuut lo.

³³ I e war aregii, “Kiar u la ina Jerusalem, ma ri ku la solamufu e Sikow e Kaltu tife fam paklure fam pris ma fan titsa lo fafanau, ma ri ku fakutun aiya una met ma ri kamu tow ilo limre fan Jentael.

³⁴ Ri ku tumaru ma ri ku kansu ma ri ku napsi ma ri ku paketmet ini. E tuul e biing wimi i eu matet mil kosnge minet.”

Gatgatom ke Jeims ma Jon

³⁵ Jeims ma Jon un sikow e Sebedi, ru ka sa puek ta lo Yesus ru ka peteng tifi aregii, “Titsa, kama bura ini ou gow e mok gii kama ka bura lo kama.”

³⁶ Ka gatom ru aregii, “Kamu bura ini yau gow e sese mok lo kamu?”

³⁷ Ru ka peteng tifi, “On tauf kama ina isam. Neng ilo galu miil ma neng ilo galu kais, lo biing ou puek ilo keu finaswen.”

³⁸ Sakle Yesus ka peteng tifu aregii, “Kamu tibi parfat kausi lo mok a kamu ka gatom yau usi. Kamu fasi ming una in lo kap gii ya ka bala in lo, ma amfagu gii* ya ku kepe?”

³⁹ Ru ka koso singi aregii, “Kama fasi.” Ma Yesus ka peteng tifu aregii, “E tikin, kap gii ya ka in lo kamuw in lo, ma amfagu gii ya ka fagu ini kamu ming kamuw kepe.

⁴⁰ Sakle se una kiis ilo galu miil ma ilo galu kais lo yau, e tibi ta faim kiang una gow, e tam. Male gii e ta kere fa Deo e sau fagatiufu usi ri.”

* **10:38 10:38** Sunwar gii kap ma amfagu, e ta un sunwar toftof lo ongker ma minet ke Yesus.

⁴¹ Biing tikii sangful na disaipel uwa ri ong lo mok Jeims ma Jon ru gatom usi, ri ka balasak iru.

⁴² Yesus ka tau tiim iri ma ka peteng tifri aregii, “Gau parfat ini fam paklure fan Jentael, ri bakir iyat iri, ma ge lamlam keri riu tungen ri una melmel lo pikli ri.

⁴³ Safle gam, sinang a eu tibi mel ilo falifu lo gam, e tam. Kaltu e bura ini eu ta i na kaltu bakir lo falifu lo gam, e samusu ta ina kaltu na faim sing gam,

⁴⁴ ma kaltu e bura ini eu ta kaltu na famu i gam, e samusu ta kaltu na faim fofoes kere tongge nano.

⁴⁵ Anwarow Sikow e Kaltu ming e tibi puek ini tongge ri ku faim singi, e tam. I e puek una faim singri ma ku tow e ninliu kia tibom are fimfiil una fil familre tongge fuunfuun.”

Baf Batimes e par mil

⁴⁶ Yesus tura fan disaipel ri la puek ulo taon Jeriko. Ma Yesus ka la tingwa tura fan disaipel kia, ri ka la tura singmat na galung kaltu ri mi nami. E mel e baf asow gii Batimes, sikow e Times, e kiiskiis ulo anisow e sal ka su farfaran fan mok ma mani singre tongge.

⁴⁷ Ka ong ini Yesus tingna Nasaret e puek, ka tau rawas sak aregii, “Yesus, Sikow e Dewit, o samusu tengis yau!”

⁴⁸ Tongge fuunfuun ri ka porow ma ri ka war singi aregii, “Om fakuta e ngusum.” Sakle e su tau bakir sak aregii, “Sikow e Dewit, o samusu tengis yau.”

⁴⁹ Ma Yesus ka ti sok ma ka war, “Tau ini wagii.” Ma ri ka tau ine baf a ma ri ka war singi aregii, “Balam eu su raw. On matet! E tau i o!”

⁵⁰ Ka bas ine ke saket ma ka ti saupesak, ma ka la use Yesus.

⁵¹ Ma Yesus ka gatmo aregii, “O bura ini yau gow e sa lo o?”

Ma baf a ka war singi aregii, “Titsa, ya bura ini yau par.”

⁵² Ma Yesus ka war singi, “La, titinge kiam e sau faliunge o.” Ma saupesak anmata ka par. Ma ka mi nami e Yesus.

11

Yesus e kaulek una Jerusalem are king

¹ Biing ri fatat una Jerusalem, ri puek una Betfage ma Betani ulo paklunmale Olif. Yesus e tuleni famu e u neng lo re fan disaipel kia,

² ma ka war singru, “Kamu la ilo sunmale ai famu. Kamuw kau ilo, kamu ku pari e dongki fuu ri kawefu, e tifik tikas sekit eng kiis ulo. Pikufu ma kamu ku tat feni wagii.

³ Le tikas ku gatom kamu, ‘Usi e tamu kamu ka pikufu?’ Peteng tifi ini Taufi e bura ma i e mu tuleni mil gii sekit.”

⁴ Ru la ma ru ka la pari e dongki fuu una male ulo sal, ri kawefu fatatu e matangkton. Biing ru pikufu,

⁵ e mel e tongge ri titi uwa ri gatom, “Kamu tamu, kamu ka pikii e dongki fuu a?”

⁶ Ru ka koso aregii Yesus e sau peteng tif ru, iya tongge ri kam tauf ru ka la.

⁷ Biing ru mil tura dongki fuu tife Yesus, ru bas fan saket keru ulo poktow, ma i kam kiis ulo.

⁸ Mara tongge ri sosol fang kolos tapak keru ulo sal, ma fa ri sosol teltelen au ri sam tetes tingna mok. ⁹ Fa ri famu ma fa ri mi ri tiin tautau lala, “Akteni, Deo e warfakausi e se e puek lo asow e Taufi.

¹⁰ Deo e war fakausi e kepmale gii ku puek, ke tamrer Dewit! Akteni e asow e Deo!”

¹¹ Yesus e puek una Jerusalem ka kau ulo Felun Nining Bakir, i e alal fawet lo mara mok, safle e sau bala or, iya kasu lamil una Betani tura sangful ma eu na disaipel kia.

Yesus e fesel suu ire tongge tinglo bala felun nining bakir

¹² Lo biing usi ri ka la tingna Betani, ma Yesus ka la biis.

¹³ I e manngeni e au fik e tum, ka la pari ini eu fira. E puek ulo warow ka pari ini e tek ti amfirow, sakle awawu, anwarow e tibi ta biing kia una fira.

¹⁴ Ma Yesus ka war singe au fik, “E mu tek tikas, eu en tiam fingsam mil.” Ma fan disaipel kia ri ka ongni e ke sunwar.

¹⁵ Lo fespuek kia una Jerusalem, Yesus e kau ulo bala balo lo Felun Nining Bakir ma ka tofinge una fesel suu ine fa ri fifil ma fa ri umat. E ikis paktur ine teibel kere fa na pilpiliis fan mani, ma fam fate kere fa ri umat ine fan man.

¹⁶ E tibi a-uu ine tikas eu kepe ti mok una umat ku sol paket tura ilo bala balo lo Felun Nining Bakir.

¹⁷ Ma ka fabenge singri, “Ri siitufu be? ‘Kek fel ri fotngi ini fel na nining kere mara male?’ Sakle gam gow ka ta fel na keskeskum singre tongge na kinkinau.”

¹⁸ Fan paklure fan Pris ma fang titsa lo fafanau ri ongni ma ri ka sik ine ti sal una paketmet ini, usi ri soke, le tongge ri kuufsak lo fam fabenge kia.

¹⁹ Lo efef oror, ri suu tinglo bala siti.

Au fik e main

²⁰ Lo biingbiing e mok, ri fes lala ri ka la, ri ka pari e au fik e main kiruur.

²¹ Pita ka sangfi e sunwar ke Yesus ma ka war singi, “Titsa, par! Au fik le o ka wiim lo, e sau main.”

²² Yesus ka koso, “O samusu titinge tikin lo Deo.

²³ Ya peteng tikin tifo, le tikas ku war singe paklunmale gii ini eu of pu ina kasap, ma ku tibi sang fa-u ma ku titinge lo sunwar kia ini eu fuut, eu fuut aregii i ka peteng.

²⁴ Gii ya peteng tifo, sese mok o gatom usi ilo nining, o samusu titinge ini o sam kepe, ma sa a, eu ta kiam.

²⁵ Le o ka ti o ka nining, ma o ka sangfi e tubiil ke neng tura o, ma o ka balasak aiwa ine neng a, sangintafngi, usi Tamam ilo balambat i eu sangintafngi e fan tubiil kiam.”

²⁶ *

* **11:26 11:26** Fa lo re tongge parfat ri sangfi ini e mel e neng e su ming ilo 11:26. Sunwar a e ngo aregii, “Ma le o ku tibi sangintafngi e fan tubiil kere fa, Tamam ilo balambat eu tibi kepufu e fan tubiil kiam.”

Sese rawas Yesus e mel lo

²⁷ Ri la puek mil una Jerusalem, ma lo biing Yesus ka fes kaulek ulo balo lo Felun Nining Bakir, fam paklure fam pris ma fan titsa lo fafanau ma ge lamlam ri ka la usi.

²⁸ Ri ka gatmo, “O gow e mara mok gii lo sese rawas? Ma se tow e rawas a tifo?”

²⁹ Yesus ka koso, “Yau bi gatom gam ine tikii gatgatom. Gam ku koso sing yau, ma ya kamu peteng tif gam ine sese neng e rawas a, ya ka gow e mara mok gii lo.

³⁰ Amfagu tarawen ke Jon e ta tinglo balambat tam singe kaltu, gau peteng tif yau!”

³¹ Ri fawar usi u falifu iri tibom, ri ka war, “Le kiar ku peteng ini ‘Tinglo balambat,’ i eu gatom, ‘Gii ma e tamu gii gam ka tibi titinge lo?’

³² Ma le kiar ku war, ‘Singe kaltu,...?’” (Ri soke re tongge usi ri nano ri sam tiim parfat ini Jon e ta profet tikin.)

³³ Ma ri ka koso singe Yesus, “Kemem tibi parfat.” Yesus ka war, “Yau ming ya mu tibi peteng tif gam ine sese rawas a, ya ka gow e mara mok gii.”

12

Warwar toftof lo palang na waen

¹ Yesus kam tofngge seseng tifi ming lo warwar toftof, “Kaltu e so e palang na waen ka balo liflifti, ma ka kefi e ampolo una pupul waen, ma kam gow e fel e kiis iyat una parpar kale lo, ma ka towfu tifi tongge na efefe lo, ma ka la ulo neng e male u tapak. ² Biing e matuk faim, ka tuleni

e kaltu na faim kia use re tongge na efefe lo ke palang una la sele lo fan fingfingwan waen tinglo ke palang.

³ Sakle ri bingfamti, ri ka fapaket ini ma ri ka tuleni ka la mil fofoes.

⁴ Wimi ka tuleni ming e neng e kaltu usi ri, ri ka fisi e kaltu gii lo paklu ma ri ka pete maiyai sekit ini.

⁵ Ka tuleni ming e neng, ma i e neng a ri ka paketmeteni, ka su tuleni ming e fa fuunfuun, fa ri paket ri ma fa ri ka fismetmet iri.

⁶ “I e mel e su tikii neng uwa una tuleni, sikow tibom gii ka bura sak, i e am tuleni wimi iri nano. Ma ka war, ‘Riu natkeni e sikuang.’

⁷ “Sakle tongge a, ri fawar iri tibom, ‘Kaltu gii eu kepe e ninsiow e tamow. Kerek pakti ku met ma ninsiow e tamow ku ta kiar.’

⁸ Ma ri kabuk la tatfeni ri ka la paketmet ini, ma ri ka la bas suu ini una male lo palang.

⁹ “Sa ming gii kaltu ine palang na waen kia kamu gow? I eu su puek ku paket metmet ire tongge a, ma ku tow e palang na waen kia tifre fa.

¹⁰ Gam tifik wese e sunwar ke Deo?

‘Fat lewa tongge parfat na bilbilse fam fel ri guuluung ini,
e sau puek ka ta warow e fel.

¹¹ Taufi e bilseni aregii,
ma e piik sak nan matrer.’ ”

¹² Wimi fam paklure fam pris ma fan titsa lo fafanau ma ge lamlam ri ka sik ine ti sal una bingfamti le ri parfat ini e gow e warwar toftof

gii lo ri. Sakle ri soke re singmat na galung kaltu a, ri ka su tafu ma ri ka la kosngi.

Tow e takis tife Sisa

¹³ Wimi ri kam tulere fa lo re fam Farasi ma fa ri ti inami e King Erot usi e Yesus una sormo ku bas saef ine ti sunwar ma ri ku bingfamti.

¹⁴ Ri sa puek talo Yesus ma ri ka sa war singi, "Titsa, kemeu parfat ini o riis tikin. O tibi se singe tikas anwarow o tibi sang usi ri nase ri, sakle o fabenge ine e sal ke Deo ususi e mok e tikin. E riis una bas mani tife Sisa tam e tam?"

¹⁵ Kiar u bas fimfiil tam e tam?"

Sakle Yesus e sau parfat lo ansinang na balri, ka gatom ri aregii, "E tamu gam ka tofo una lam yau? Gam tow e ti mani a wagii ya ku bi par lo."

¹⁶ Ri ka sangau ine mani a tifi, ma kabuk gatom ri, "Tangow e se le gii? Ma panta ke se?"

Ri ka koso a, "Ke Sisa."

¹⁷ Kala Yesus ka peteng tifri, "Tow e sa ke Sisa tife Sisa, ma sa ke Deo tife Deo." Ma ri ka kuufsak singi.

Antinaule lo biing na matet mil

¹⁸ Kala fan Sediusi, tongge gii ri ka peteng ini e tek ti matet mil, ri ka puek use Yesus tura neng e gatgatom.

¹⁹ Ri gatmo aregii, "Titsa, ilo buk, Moses e siisiit uf tif kiar aregii, ini le ti tualik e ti kaltu ku met kosngi e ke wok, ma ku tifik mel e ti sikow, kaltu a e samusu tili e makos a usi eu mel e sikow e tualik.

²⁰ Gii e mel e baba fis na fatualik, neng baba tikii e tinaule ma ka met ma e tifik mel e ti sikow.

²¹ Neng baba e u ming e tili e makos a, sakle i ming ka su met ma ka tifik mel e ti sikow. Neng baba e tuul ming e su gorot aiya.

²² Tikin lo. Baba fis na fatualik a, e tek tikas lo ri ek mel e ti sikow singe makos a, sakle wimi sekit makos a ka met.

²³ Biing na matmatet mil i eu ta wok ke se gii, le baba fis na fatualik gii ri nano ri tiin tili?"

²⁴ Yesus e koso mil aregii, "Gam tubiil, anwarow gam tibi parfat lo sunwar tam rawas ke Deo.

²⁵ Lo biing na matet mil singre fan minet ri mu tibi tinaule, riu su la ngo are fan angelo ilo balambat.

²⁶ Ma gii lo sunwar lo re tongge una matet mil, gam tibi wese ulo buk ke Moses e sunwar tinglo iif ulo au? Deo e war singi aregii, 'Iya na Deo ke Abra-am, Aisak ma Jekop.'

²⁷ I e tibi ta Deo kere fan minet, e tam. I e ta Deo kere fa ri liu, gam sam tubiil bakir sak."

Fafanau baba tikii

²⁸ Neng lo re fang titsa lo fafanau, ka fespuek kasa ongen ri fafatinge, ma ka ongni Yesus e koskos fakausi e fang gatgatom keru ka sa gatmo aregii, "Ilo fam fafanau nano, sese neng lo ri eu bakir iyat iri nano?"

²⁹ Yesus e koso aregii, "E su tikii neng e ta iyat iri nano, 'Ong kausi Israel, Deo Taufi kiar, e su tikiin i,

³⁰ bura e Deo Taufi kiam ine ambusbusam kiruur, tura tanguam kiruur, tura sinangum kiruur, ma mara rawas kiam kiruur.'

³¹ Nenge u aregii, 'Bura e taltalum, are o bur o tibom.' E sam tek ti fafanau ek bakir iyat ine uneng gii."

³² Titsa lo fafanau a ka koso, "O sam war riis titsa, e tikin o ka peteng ini Deo e su tikiin i, ma e sam tek tikas ming, sakle i tibom.

³³ Una bura ine ambusbusam kiruur tura mara sinangum, ma tura mara rawas kiam, ma una bura e taltalum are o buro tibom e ta iyat ine mara finafen ri taif lo ma fan mara finafen."

³⁴ Yesus ka ongni ini e sam kos fakausi, ka war singi aregii, "O am tibi tapak ine Kepmale ke Deo." Tinglo biing a, e tek tikas e au bura una gatmo ming ine ti gatgatom, anwarow ri soke.

Sikow e se gii Kristus

³⁵ Yesus e fabenge singri ulo bala Felun Nining Bakir, ma ka gatom ri aregii, "Areini gii fan titsa lo fafanau, ri ka peteng ini Mesaiya e ta sikow e Dewit?

³⁶ Ma Dewit tibom ka war lo rawas ke Tangwa Riis ka peteng ten.

'Taufi e peteng tife Taufi kiang aregii:

"Kiis wagii lo galu miil lo yau
ku muut yau tauf re fa ri is o,
ilo pikliu e rawas kiam." '

³⁷ Dewit i tibom e fotngi ini 'Taufi' ma areni gii ku ta sikow?"

Singmat na galung kaltu a ri ongne singi tura konona fefeal tikin.

³⁸ Yesus e fabenge singri ma ka war "Ate use re fan titsa lo fafanau. Ri bur fesfes faliu tura konona fan kolos ma ri kam isa e fan male na umumat una are ri.

³⁹ Ma ri ka su burbura e fan fate kausi ilo felun nining, ma ri bur kiis kausi i famu lo fan en bakir.

⁴⁰ Ri es fofoes ma bero ine fam fel kere fan makos, ma ri kam nining taptapak sak, una su fafanas iri. Tongge gii riu kepe ongker bakir sak lo anganggon.”

Fafen ke wok makos

⁴¹ Yesus e kiis ulo galu lo mok na basbas mani talo, ma ka alal lo re tongge ri basbas mani talo sinatiim ke Felun Nining Bakir, fa fuunfuun lo ri, tongge tuba mel, ri ka bas bakbakir a.

⁴² Sakle e mel e neng e sasngal na fefin e makos ka fespuek ka sa bas ine um boron mani e ngo are tikii toiya.

⁴³ Yesus e tau ire fan disaipel kia usi, kala peteng tifri aregii, “Ya peteng tikin tif gam, boron makos sasngal gii, e bas bakir sak talo sinatiim ke Felun Nining Bakir, iyat ire tongge nano gii.

⁴⁴ Fa nano gii, ri tow e sa a ka ngo sok lo tuba ri, sakle i e wok makos gii, e tou kiruur tinglo sasngal lo, e mara mok gii ku liu lo.”

13

Fan tintof lo biing muut

¹ Biing Yesus e fes tinglo Felun Nining Bakir ka la, neng lo re fan disaipel kia ka war singi, “Titsa, Om bou par lo sese singmat na tom fumfat gii, ma konona tom fel.”

² Yesus e koso aregii, “O sau pari e konona fam fel lamlam gii? Eu tek ti fu lo fatfat gii eu la ngosok ilo poktow e ti neng e fu. Riu rarang pu iri nano.”

³ Sum biing Yesus ka la kiiskiis ulo paklunmale Olif, ilo galu wiwang lo Felun Nining Bakir, Pita, Jeims, Jon ma Enru ri kam sa gatom borong ini,

⁴ “Peteng tif kemem nangis fan mok gii eu fuut? Ma sa eu ta tintof una peteng fate ini fan mara mok gii e sau bala puek?”

⁵ Yesus e koso, ma e peteng tifri aregii, “Gam u ate are tikas kasa gurum i gam.

⁶ Fa fuunfuun riu puek lo asang ri ku peteng ini ‘Yau gii Kristus’, ma ri ku gurum ire fa fuunfuun.

⁷ Ma le gam ku ong lo tuui, ma fan warwar lo tuui, gam u tibi kuufsak. Fan mok gii e samusu puek, sakle biing muut e tifik bala puek.

⁸ Nenge male eu fapaket tura neng e male, ma neng e matambia eu fapaket tura neng e matambia, ma eu mel e anggi ilo fanenger fan male ma biis faen. Fan mok gii eu suupuek famu ini are fefin e ongker una fasus.

⁹ “Efe kausi lo gam tibom, riu ta gam tifre fang kaonsiil, ri ku paket gam ilo bala fam felun nining, anwarow lo yau. Ma o ku ti namatre fan taufi lo ri, ma fang king, i e sumbiing a e ta biing kiam una sesngeni e sunwar kiang tifri.

¹⁰ Ma famu tongge nano ilo an mara male riu bi ongni e konona sunwar.

¹¹ Ma biing riu bingfamti o ma ri ku tauf o ilo anganggon, mele sangfuunfuun usi e sa a ou peteng ini, su seseng ine sese sunwar Deo eu tow tifo lo biing a, anwarow e tibi ta o lea o war. Tangwariis lea e warwar.

¹² “Nenge kaltu eu fafen ine tualik tikin ri ku paketmet ini, ma tamabo-i eu gow aiya ming e

sikow tikin, ma berberat riu sak lo tamtamri ma tintinri, ri ku fauun iri, ri ku paketmet iri.

¹³ Tongge nano riu sak lo gam, anwarow lo yau, sakle se eu titi raw ku muut lo biing muut Deo, eu kep familia.

¹⁴ “Lo biing gam u pari e ‘mok saksak sekit a, una bero ine male’ eu puek ku titi ilo mok e tibi ta tafu, (kaltu na weswes e samusu ten ini,) tongge, ri na Judia, ri samusu fin ri ku la ilo fam pakpaklunmale.

¹⁵ Ma e tek tikas ilo poktow e fel eu bi pu ku lamil una la kepe ti mok tinglo bala ke fel.

¹⁶ Ma neng ilo bala palang eu tibi mil una sa kepe e malu.

¹⁷ Ma kiskam singre gelesin tian, ma fan tintinabo-i. Are riu gorot lo biing a.

¹⁸ Ma gam u nining rawas usi biing a eu tibi puek lo bala anmair.

¹⁹ Anwarow lo biing a eu ta biing lo singmat na mafet, eu tibi ngo are tinglo biing Deo e bilseni e mara mok, ma eu tek ti singmat na mafet, eu ngo aiya ming wimi.

²⁰ Le Taufi enggi tibi faposposo e biing a, tongge nano ring gi tuup. Sakle e sagif re tongge a i ka wel ri, iya ku faposposo e fam biing saksak a.

²¹ Lo biing a le tikas ku peteng tif gam aregii, ‘Par, igii e Kristus!’ tam ‘Par, i lei!’ Gam u tibi titinge singi.

²² Anwarow fang Kristus gurgurum ma fam profet gurgurum riu suupuek ri ku gow e fan tintof, ma fan mok na tibou fuut. Ma una fabeku e fanenger fan mok ming, una pete luut ire tongge e sam wel ri. Le ku fasi.

23 O samusu efe kausi lo o. Ya sau peteng tif gam ine mara mok gii, famu ine biing a.

24 “Sakle lo fam biing wimi ini e singmat na mafet a,

‘eu or e mata e pisii

ma funiil e mu tibi pal.

25 Fang keltot ailo batsok riu luut,

ma fan rawas tinglo batsok riu ban.’

26 “Ma lo biing a riu pari e Sikow e Kaltu, eu puek ilo balbal tura singmat na rawas ma finaswen.

27 Ma ku tule re fan angelo kia una keptiim ire tongge e wel ri, tinglo e fet e matang kif lo rorop lo male gii faf ku la muut lo rorop lo balambat.

28 “Ma gii gam u sagif famti e fabenge lo au fik. Biing teltelow e arwan ma ka dur, o sau parfat, biing lo pisii e sau fatat.

29 Le o ka pari e fan mok gii eu puek, o sau parfat a, ini i e sau fatat sekit ilo matangkon.

30 Ya peteng tikin tif gam, kulu gii riu tifik tam iri, ku muut lo mara mok gii eu fuut.

31 Batsok ma nal eu tam iru, sakle sunwar kiang eu tibi fasi sekit una tam ini.

32 “E tek tikas ek parfat lo biing ma anmatam pisii. Fan angelo tinglo balambat ri tibi parfat, Sikow ming e tibi parfat, sakle Tamow tibom i e parfat.

33 Gam u parpar ma gam ku efefe, gam tibi parfat lo biing mok gii eu puek.

34 E su ngo are kaltu e bala fes tapak kosnge ke fel, ma ka ti ine tongge kia lo fam faim. Tikii neng tikii neng eu gow e faim kia, ma ka peteng tife neng e efefe lo matangkon una parpar.

³⁵ “Ilea, bingne gam u parpar anwarow gam tibi parfat lo biing Tamow e fel eu mil lo. Eu ta lo efef, tam lo palim e biing, tam lo tengteng e porot tam lo bau e male.

³⁶ Ma le ku fakuuf ine puek kia, ou tibi masun lo biing e puek.

³⁷ Sa gii ya ka peteng ini, ya peteng ini tifre tongge nano, ‘Gam samusu efefe!’ ”

14

Fefin e tipeni e wel ulo fow e Yesus

¹ E buk su u e biing uwa ine En na Kepsiliwi, ma En Bakir lo Beret e Tek ti Is. Fam paklure fam pris ma fan titsa lo fafanau ri siksik ine ti sal borong una bingfamti e Yesus, ma ri ku paketmet ini.

² Sakle ri am la fawar aregii, “Eu tibi ta lo Biing Bakir a, are tongge ri ka fagorot.”

³ Biing i auna Betani ka kiiskiis ulo fate ma ri ka enenen ulo bala fel ke Saimon kaltu lepra. Nenge fefin e fespuek tura botol ri gow lo alabasta ine sanda mata e kanek sak, ri gow lo danu e neng e au. E biwis pakti e anmatow e botol a ma ka tipeni ulo paklu e Yesus.

⁴ Sakle fa lo ri, lo biing a, ri fawar fa ngungut ulo falifu lo ri aregii, “Usi e tamu ka bero ine sanda gii?”

⁵ E kausi ini riu umat ini ku fasi lo fimfiil ke kaltu lo tikii matamfaim, ma ri ku tow e mani tifre fan sasngal.” Ma ri ka porow e fefin a.

⁶ Sakle Yesus e war singri, “Gam taufu, e tamu gam ka bero ine sinangu? Fefin gii e gow e konona mok lo yau.

⁷ Bingne tongge sasngal riu melmel tura gam, ma gam amu ules ri lo sese biing gau bura. Sakle yau tibi melmel bingne tura gam.

⁸ Fefin gii e sam gow e sinang e fasi ini i eu gow. E tipeni e sanda ulo fong famu una ternge yau ma ri ku of yau.

⁹ Ya peteng tikin tif gam, ilo sese male gii lo nal riu sesngeni e konona sunwar, sa fefin gii e sam gow riu tet ming ini una sangsangfi.”

¹⁰ Wimi Judas Iskariot, neng lo sangful ma e u na disaipel, e la use paklure fam pris una la solamufu e Yesus tifri.

¹¹ Ri la terterer sak una ongni e sunwar gii. Ri ka limlim ini riu, feli ine mani. I kau parpar ine ti sal una tow e Yesus ilo limlim ri.

Yesus e enmuut tura fan disaipel kia

¹² Lo biing baba tikii lo fam biing lo En Bakir lo Beret e Tek ti Is, le e ta ninis keri, una fafen ine boron sipsip lo En na Kepsiliwi, fan disaipel ke Yesus ri gatmo aregii, “O bura ini kemem u la terer salu o, una eni e En na Kepsiliwi ilo sese fel?”

¹³ I kam tuleni e u e neng lo fan disaipel kia ma ka peteng tifru aregii, “Kamung kau ailo bala siti a, ma neng e kalu e ufufu lala e botol na dan eu tupnge kamu, kamuw mi nami.

¹⁴ Kamu ku la peteng tife kalu ine ke fel a i ku kau ilo, ma kamu ku peteng tifi aregii, ‘Titsa e gatom ini, iya e keptim fel na melmel gii, ya ku gow e En na Kepsiliwi tiim tura fan disaipel kiang ilo?’

¹⁵ I e mu fanangsi kamu ine keptim fel bakir iyat. Fan mara mok ri sau fagatiufu ma kamu mu fagati e fan tuan ilo nene kiar.”

¹⁶ Un disaipel ru la, ru ka kau ulo bala siti ru ka pari e mara mok aregii, Yesus e sau peteng tifru ini, iya ru ka bilse ulo, wilo En na Kepsiliwi.

¹⁷ Kala efef lo biing a Yesus ka fespuek tiim tura sangful ma eu na disaipel kia. ¹⁸ Biing ri kiis falifit ri ka enenen ulo ngiin a, Yesus ka war aregii, “Ya peteng tikin tif gam, neng lo gam eu solamuf yau, neng gii ka enen gii tura yau.”

¹⁹ Ri la sangkuuluung ma tikii neng tikii neng e gatmo, “E ngo areni e tibi ta yau be?”

²⁰ Yesus e koso, “Eu ta neng lo gam na sangful ma eu na kaltu. Tikii neng a ku fasow e sum beret ilo bala dis tura yau.

²¹ Sikow e Kaltu eu la are lea sunwar ke Deo kabuk peteng fate ini. Sakle kiskam singe kaltu a ku solamufu e Sikow e Kaltu! Enggi kausi singi le i enggi tibi fuut.”

²² Biing ri enenen, Yesus ka kepe e beret ka katfarsi e Taufi lo, ma ka paek paki, ma ka tow tifre fan disaipel kia ma ka war, “Kepe igii e fong.”

²³ Wimi ka kepe e kap, ka katfarsi e Taufi lo, ma i ka tow tifri ri nano ri ka in tinglo.

²⁴ Ma ka peteng tifri aregii, “Igii e dakung una keptiim i kiar. I e lingi uf use re tongge.

²⁵ Ya peteng tikin tif gam, ya mu tibi in mil lo amfirow e waen ku la muut lo biing a, yau la inmi mil e waen fuu ilo bala Kepmale ke Deo.”

²⁶ Ri ka seke e seksek tikii ma ri kam suu ri ka la ulo paklunmale Olif.

Yesus e peteng ini Pita eu fatuul gurum

²⁷ Ma Yesus ka peteng tifri aregii, “Titinge kemi eu luut, anwarow sunwar ke Deo e sau peteng, ‘Yau pakti e efefe lo fan sipsip, ma fan sipsip ri ku fin falek.’

²⁸ Sakle wimi yau matet mil, yau ku la famu i gam ina Galili.”

²⁹ Pita e war rawas aregii, “Le ri nano ri ku tiim luut, yau tibi luut.”

³⁰ Yesus e koso, “Ya peteng tikin tifo, na panambiing famu ine porot eu fa-u teng o fatuul peteng ini o tibi parfat lo yau.”

³¹ Sakle Pita e war rawas ini, “Antalu ya ku met tura o, yau tibi la kosing o sekit.” Ma iri nano ri ka tiin war ine tikii sunwar.

Getsemeni

³² Ri la ulo male ri fotngi ini Getsemeni. Ma Yesus ka peteng tifre fan disaipel kia, “Gam u kiiskiis wagii, ma ya ku la nining.”

³³ I e onu e Pita, Jeims ma Jon ri ka la nami. Ma kabuk tofnge e sangkuuluung aulo bala ma ka la sangkut.

³⁴ I e war singri tuul, “Singmat na ongker ma fatengis gii e sam afti kiruur e tangwang, fatat ma ya ku met. Gam tuul u melmel wagii ma gam tuul ku parpar.”

³⁵ E la u tapak balik ka luut ulo nal, ma ka nining ini le ku mel e ti sal, mafet gii eu ifit ini.

³⁶ Ma i ka war, “Aba, Tabuung, mara mok e paumil singo. Tii ine kap gii kosing yau, sakle ou tibi usi e fabur kiang, su gow e sa o bura.”

³⁷ Wimi ka mil use tuul e disaipel kia ma ka pari ini ri sau masun. I ka war singe Pita, "Saimon, o masun? E tibi fasi ini gam u parpar lo tikii ti anmatam pisii?"

³⁸ Gam u parpar ma gam ku nining are gam ka luut singe falam. Tangtangwami e fabur, sakle fofomi e main."

³⁹ Yesus ka la mil ming, ka la nining are famu.

⁴⁰ Biing i e sa mil, ka sa pari ming ini ri masmasun aua, ka fongen ri, sakle matmat ri e mafet sak. Ri am tibi parfat ine are riu war singi.

⁴¹ I ka mil baba e tuul, ka sa war singri, "Gau masmasun ma gam ka manmanau aiwa? E sau muut wa biing e sau puek. Par! Sikow e Kaltu riu solamufu ku la ilo limlimre ge saksak.

⁴² Gaman matet! Kerek la! I gii kabuk puek e neng una solamuf yau!"

Ri bingfamti e Yesus

⁴³ Biing e warwar aua, Judas neng lo re sangful ma eu ka suupuek. Ma unaisa, singmat na galung kaltu tura fan iriringgot ma fang kepsil, fan titsa lo fafanau ma fam paklure fam pris, ma fang kaltu bakir keri, ri tule ri.

⁴⁴ Gii kaltu una solamufu e sau fagatiufu e peteng fate tifri, "Neng gii ya ku osngi e sam ta i, bingfamti, tatfeni ku la ma efe kausi lo."

⁴⁵ Judas e fespuek sekit use Yesus ka sa war, "Titsa!" ma ka osngi.

⁴⁶ Ma tongge a ri ka ti kali e Yesus ma ri ka bingfamti.

⁴⁷ Ma wimi tikii neng lo ri e titi u fatat ka efufu e ke ringot ma ka teseufu e ambalbalu e kaltu na faim ke paklure fam pris.

⁴⁸ Yesus ka gatom ri, “Areni, ya na kaltu una fafapaket ma una kinkinau, gii gam ka fespuek tura fan iringgot ma fang kepsil una sa bingfamti yau?

⁴⁹ Mara biing yau tura gam, ya fafabenge ulo bala pakanmale lo Felun Nining Bakir, ma gam tibi bingfamti yau. Sakle gii, sunwar ke Deo e samusu fasef.”

⁵⁰ Tongge kia ri nano ri la kosngi, ma ri ka fin falek.

⁵¹ Nenge guam e su los lo sakle kolos tapak, e mimi lala nami e Yesus. Biing ri tofo una bingfamti,

⁵² i e fin biilbiil kosngi e ke kolos ka ngosok.

Yesus e ti ufamu ire fang kaonsiil

⁵³ Ri onu e Yesus use paklure fam pris lamlam, ma fam pris lamlam, ge lamlam ma fan titsa lo fafanau ri sa tiim lo ri.

⁵⁴ Pita e mimi lala nami, sakle i aua u tapak balik, ka la kau sekit ulo bala ampalkanmale ke paklure fam pris, Ka la kiiskiis wa tura tongge na efefe, ka la mingmingii ulo iif.

⁵⁵ Fam paklure fam pris, ma fan kaonsiil ri tau ire tongge una peteng ine fan mok Yesus e sam gow. Ri bala sesuupuek ine ti tubiil kia usi ri ku paketmet ini. Sakle ri tibi sik seni e ti tubiil kia.

⁵⁶ Fa lo ri, ri seseng gurgurum talo, sakle fan sunwar ker i e tibi tiin ngo.

⁵⁷ Wimi fa ri matet ri ka ti, ma ri ka gow e angurum gii talo.

⁵⁸ “Kemem ongni e peteng aregii, ‘Yau bero ine Felun Nining Bakir gii tongge ri ka gow, ma ilo bala e tuul e biing, yau feti e neng e tibi ta kaltu e gow.’”

⁵⁹ Sakle awa fan susunwar keru e tifik la tiin ngo.

⁶⁰ Sakle wimi paklure fan pris ka ti u famu iri ma ka gatmo e Yesus aregii, “Areini ou tibi koso e ti sunwar? Sese fan warwar le gii tongge gii ri ka gow una bero i o?”

⁶¹ Sakle Yesus aua e tibi kukueng, e tibi koso e ti sunwar. Kala paklure fam pris ka gatmo, “E sam ta o na Mesaiya, Sikow e Deo aiya?”

⁶² Yesus e war, “Yow, yau mung, ma gam amu pari e Sikow e Kaltu eu kiis ilo galu miil lo Deo, ma eu mil lo aumbalbal tinglo batsok.”

⁶³ Paklure fam pris lamlam e rangsi e kolos tapak kia, ma ka war, “Ker am tibi bura e ti tong kaltu ming una peteng ten.

⁶⁴ Gam sau bom ongni, i e fotpursi e Deo. Are gam sang?”

Ri nano ri tiim peteng, e tubiil, e samusu met.

⁶⁵ Fa ri tofng e una kansu, ma fa ri ka fis kali e wanmata, ma ri ka tutu ine limlim ri, ma ri ka war, “Peteng tif kemem ini se e paket o.” Ma fan efefe ri kabuk tatfeni ri ka la pakti.

Pita e alau fofosi e Yesus

⁶⁶ Biing Pita e la ulo ampalkanmale, neng lo re gelefina faim ke paklure fam pris ka fespuek.

⁶⁷ Ma ka pari e Pita e mingmingii, kabi iliim fakausi ma ka war, “O ming lewa tura Yesus tingna Nasaret.”

⁶⁸ Sakle Pita e alau fofosi, “Ya tibi parfat, ma ya tibi ten lo sa o petpeteng ini.” E su war aiya ma kabuk fes ka la su ulo matangkon.

⁶⁹ Biing fefin na faim a e pari Pita e titi uwa, ka peteng ming, tife fa ri fafatie uwa, “Kaltu gii e ta lo ri.”

⁷⁰ Ma ka su alau fofosi ming. Wimi balik ini, fa ri fafatie fatatu e Pita, ri ka war singi. “E tikin ini o na neng lo ri be? O tingna Galili.”

⁷¹ Ma kabuk wes talo i tibom. Ma ka limlim tifri, “Ya tibi parfat sekit lo kaltu a gam ka petpeteng ini.”

⁷² Wimi sekit ini, porot ka fa-u teng, ma Pita kabuk la sangfi e fan warwar Yesus e sau peteng tifi ini. “Famu ine porot ma ku fa-u teng, ou fatuul peteng ini o tibi parfat lo yau.” Ale, Pita e ururung.

15

Yesus e ti ufamu ine Pailat

¹ Lo biingbiing e mok sak fam pris lamlam tura tongge lamlam, fan titsa lo fafanau, ma mara kaonsiil ri puek tura sangsang, una bingfamti e Yesus, ma ri onu ri ka la tow tife Pailat.

² Pailat e gatmo aregii, “E sam ta o na King kere fan Juda?” Yesus ka koso, “Yow e ngo are le a o ka war.”

³ Fam paklure fam pris ri fotpursi lo mara mok.

⁴ Wimi Pailat ka gatmo mil, “O tibi su fasi una kokos? Pari e fis e mok ri fotpuris o lo.”

⁵ Safle Yesus uwa e ti kokos, ma Pailat e sangfu-unfuun.

⁶ Gii e sam ta ninis lo fam biing bakir una pikufu e se tikin ilo rerek, a tongge ri ka bura.

⁷ Lo biing a, ri taufre tongge ulo rerek. Neng lo ri, asow gii Barabas. Ri fapaket tura gapman ma ri ka paketmet ire fa lo re tongge.

⁸ Tongge ri puek ri gatmo e Pailat una gow e ninis gii kabuk gowgow lo ri ting famu.

⁹ Pailat e gatom ri, "Gau bura ini yau pikufu e King kere fan Juda tif gam?"

¹⁰ I e parfat ini e su ta fan songe iya fam paklure fam pris ri ka tow e Yesus ka la tifi.

¹¹ Safle fam paklure fam pris, ri famtete e balbalre tongge una onu e Pailat, ku pikufu e Barabas subung.

¹² Pailat ka gatom ri, "Ma sa gii ya ku gow lo neng gau fotngi ini King kere fan Juda?"

¹³ Ri ka tiin tau, "Tutfamti lo aupaket!"

¹⁴ Ma i ka gatom ri, "I e tamu? Sese tubiil i e gow?" Safle ri su tautau bakir, "Tutfamti lo aupaket!"

¹⁵ E bura ini eu fawetu e fabur keru, Pailat ka pikufu e Barabas tifri, ma ka tow e Yesus tifre fan soldia ri ka napsi, ma ri kam tutfamti ulo aupaket.

Fan soldia ri tumaru e Yesus

¹⁶ Fan soldia ri onu e Yesus, ka kau ulo bala ampalkanmale ke gapman. Ma ri kam tau tiim ire fan soldia nano.

¹⁷ Ri tow e kolos e kaukaor ulo Yesus, wimi ri getiim ine amfinau soksok, ma ri ka tow ulo paklu are at king.

¹⁸ Ma ri tofnge una tau singi, “Siaro, King kere fan Juda!”

¹⁹ Ri ngos lo fisi ulo paklu ine sungkalut ma ri kankansu. Ri pukungkek ma ri ka tow e nawen tifi.

²⁰ Ma biing ri sam tumar falek ini, ri kepufu e kolos kaukaor, ma ri ka tow e neng kia tibom mil ulo. Wimi ri kam onu una la tutfamti ulo aupaket.

Ri tutfamti e Yesus ulo aupaket

²¹ Nenge kaltu tingna Sairini, Saimon, (tamow e Aleksenda ma Rufus) i e sol paket, e mil wilo siti, ma ri ka tungni una kepe e aupaket. ²² Ri onu e Yesus ka la ulo male ri fotngi ini Golgota (pimpiku gii Male ke Antuampaklung Kaltu).

²³ Wimi ri ka fainmi ine waen, ri iksi tura marasin lo ongker. Safle Yesus e tibi inmi.

²⁴ Ma ri ka tutfamteni ulo aupaket, ma ri ka fasa ine fang kolos kia falifu lo ri tibom, ma ri ka pilai satu una sik ini se eu kepe e sese mok.

²⁵ Lo anmatam pisii baba e siu lo biingbiing e mok, ri tutfamti ulo aupaket.

²⁶ Siisiit una parfailmi lo anganggon kia ulo aupaket e wes aregii; “KING KERE FAN JUDA.”

²⁷⁻²⁸ Ri tutfamti e u e kaltu na kinkinau tura ulo neng e un aupaket ming, neng ulo galu miil ma neng ulo galu kais.

²⁹ Fa ri ka sol singi, ri tumar saksak ini, ri belbel ine pakpakluri ma ri ka war, “O lewa o ka peteng ini ou bero ine Felun Nining Bakir ma o ku feti mil lo e su tuul e biing?

³⁰ Pu tinglo aupaket ma ok bou faliunge o.”

³¹ Lo i e sangsang mung a, fam paklure fam pris ma fan titsa lo fafanau ri fatumar ini ulo falifu lo ri tibom. “I e faliungere fa, lewa. Safle e tibi fasi una faliungeni tibom.

³² Taufu e Mesaiya gii, King kere fan Israel, ku pu tinglo aupaket, usi kiar u pari ma kiar ku titinge.” Uneng ru kulik fapot ini iru ming ru tumaru.

Minet ke Yesus

³³ Lo siat tuntun, anor e afti e nal kiruur ka muut lo anmatam pisii baba e tuul.

³⁴ Ma lo anmatam pisii baba e tuul, Yesus e tau bakbakir sak, “Eloi, Eloi, Lama Sabakatani,” Pimpiku gii: “Kek Deo, kek Deo, usi e tamu o ka la kosing yau?”

³⁵ Biing fa lo re tongge a ri ka fafatie fatat, ri ongni, ma ri ka war, “Ong, e tautau ine Elaisa.”

³⁶ Neng lo ri e filau ka la utfi e spans na waen gin, ka tow ulo sungkalut, ma ka fafen ini tife Yesus ini ku inmi, ma ka war, “Kerek bi par usi, Elaisa ngan e mu sa kepufu.”

³⁷ Tura singmat na tineng, Yesus e sekpaket manangia.

³⁸ Laplap bakir ulo Felun Nining Bakir e rages ka u lo, ting uiat ka la muut ufaf.

³⁹ Ma lo biing paklure fan soldia e titi uwa u famu ine Yesus, e ongni e tengteng kia ma ka pari, are e met, i ka war, “Tikin sak, kaltu gii e ta Sikow e Deo!”

⁴⁰ Fa fang gelefin ri manman ting tapak. Falifu lo ri, Maria Makdalen, Salome ma Maria tinow e Joses ma Jeims balik.

⁴¹ Gelefin gii ri minami una Galili, ri ka efe lo fam fabur kia. Fa fuunfuun lo re gelefin ri sa la tura una Jerusalem iri ming uwa.

Ri towfu e Yesus ulo balang kenit

⁴² E sau fatat lala una biing, e ta biing na terer (e ta biing famu ine sabat).

⁴³ Josef tingna Arimatia, e ta neng lo re fang kaonsiil, e ta neng lo re tongge ri natkeni, ming i e nene una pare kepmale ke Deo, e sangtanamia una la gatmo e Pailat use pinumfow e Yesus.

⁴⁴ Pailat e kuufsak le e ong ini Yesus e met saupesak. Ka fauun usi e efefe, kam gatmo ini Yesus e sau met, tam e tam.

⁴⁵ Biing e ong singe efefe ini ngo aiya, ka a-uu ine pinumfow e Yesus tife Josef.

⁴⁶ Josef e feli e fan laplap, ka kepu ine pinimfow e Yesus, ma ka afti ine fan laplap ma ka towfu ulo balang kenit, ri sam kefi ulo fam. Wimi kau filiitngeni e fumfat kaleni e matangkoni lo balang kenit.

⁴⁷ Maria Makdalen ma Maria tinow e Joses ru pari e mok ri fangongi e Yesus ulo.

16

Matmatet mil ke Yesus

¹ Biing Sabat e rop, Maria Makdalen, Salome ma Maria tinow e Jeims ri tuul la fifiil fan wel e mel a konona sanuu una la mofo e fow e Yesus.

² Biingbiing e mok sak lo biing baba tikii lo wik, wimi sekit ine pisii e fen, ri tuul fes una la ulo balang kenit.

³ Ma ri tuul ka bou fagatomnge iri, “Se eu filiitufu e fat kosngi e matangkön wilo balang kenit?”

⁴ Sakle biing ri akte matri, ri pari ini fumfat bakir sak ri sau filiitufu.

⁵ Biing ri kaulek ulo balang kenit, ri pari e guam e los lo kolos murmur tapak e kiiskiis ulo galu miil, ri ka kuufsak.

⁶ I ka war singri tuul, “Gam u tibi kuufsak. Kemi sik ine Yesus tingna Nasaret lewa ri ka paketmet ini, e sau matet. Par wagii, e tam ini tinglo tafu.

⁷ Sakle gam tuul u la peteng tifre fan disaipel ma Pita, ini i e la famu i gam ina Galili. Gam u la pari wa, aregii i kabuk peteng tif gam.”

⁸ Ri banban ma ri sangkut, gelefin a, ri la kosngi e balang kenit. Ri tibi war singe tikas, anwarow ri soke.

(Tongge parfat fuunfuun ri sangfi ini wes 9-20, Mak tibom e tibi seti, safle nenge kaltu e am seti wimi.)

⁹ Yesus e matet lo biing baba tikii lo wik, e puek famu talo Maria Makdalen. Lewa ka feselufu e baba fis na tangwaner saksak tinglo.

¹⁰ I e la, ka la peteng fate re tongge, ri sau fesfes tiim tura Yesus. Tongge gii ri melmel tura sangkuuluung ma fatengis.

¹¹ Biing ri ong ini Yesus e sam liu mil, ma ini i e sau pari, ri tibi titinge lo.

¹² Wimi Yesus e puek ine neng e puek talo uneng lo ri, biing ru fes lala una la suu tingna Jerusalem. ¹³ Ru mil ru ka la sesngeni tifre fa lo ri, sakle ri tibi su la titinge lo sekit ming.

¹⁴ Wimi Yesus e puek talo tikii sangful ma e tikii na disaipel kia, biing ri enen. I e porau ri usi re tibi titinge, ma balbalri e kut una ong singre fa gii, ri kabuk pari ini e sau matet.

¹⁵ I e war singri, “La ilo mara male gii lo nal ma sesngeni e konona sunwar tifre mara tongge.

¹⁶ Se a ka titinge, ma ka kepe amfagu tarawen, eu mel e ninliu. Sakle se a ka tibi titinge, Deo eu fakutun aiya.

¹⁷ Deo e gow e mara mok na tibou fuut lo limre tongge ri titinge lo. Ma lo asang, riu feselufu e fan tangwaner saksak, ma riu gon tinglo fan warwar fuu kuriik.

¹⁸ Riu kepe fan sii ini e limlim ri, ma biing ri inmi e dan saksak sekit, eu tibi bero iri sekit; riu tow e limlim ri ilo tongge ri mase, riu liu.”

¹⁹ Wimi ine Taufi Yesus e sam gongon singri, Deo e kep kanek ini wilo balambat, ka kiis ulo galu miil lo Deo.

²⁰ Wimi fan disaipel ri ka la, ma sesngeni e sunwar ulo mara male, Taufi e faim tura ri ma ka farawasngeni e ke sunwar ine fan tintof e fuut tiim tura.

Konona Sunwar lo Yesus Kristus
The New Testament in the Feni language of Papua
New Guinea

Nupela Testamen long tokples Feni long Nuigini

copyright © 2024 Wycliffe Bible Translators, Inc.

Language: Feni (Warwar Feni)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

PDF generated using Haiola and XeLaTeX on 11 Aug 2025 from source files dated 11 Aug 2025

ae8d0c87-7c81-533b-9a3a-4c01263a13a8